

ଓଁ ଦିନର ନିଂଶିଓେ

ସ୍ମୃତିମହ୍ନର ଲୁ ଅନୁଭୂତିର ଲାଂକରା ସଂକଳନହାନ

ରାଜେନ୍ଦ୍ର ସିଂହ ସମ୍ପାଦିତ

ସଞ୍ଜୟ ସିଂହ



ଓଁ ଦିନର ନିଂଶିଓେ

ସ୍ମୃତିମହ୍ନର ଲୁ ଅନୁଭୂତିଲ ଲାଂକରା ସଂକଳନହାନ

ସଞ୍ଜୟ ସିଂହ

ରାଜେନ୍ଦ୍ର ସିଂହ ସମ୍ପାଦିତ

ପ୍ରକାଶିକା

ସୁନିତା ସିଂହ

ଓଦୟନଗର, ଖାନାପାରା, ଗୁରାହାଓୀ-୧୧

প্রকাশিকা
সুনিতা সিংহ
উদয়নগর, খানাপারা, গুৱাহাটী

প্রকাশকাল
কাঙৰ পাৰি ১৪১৯

স্বয়ং
সঞ্জয় সিংহ

কল্পপেক লিখন
অজিত সিংহ

মুদ্রণ
এস. এম. জে. এন্টারপ্রাইজ এণ্ড প্রিন্টার্স
জয়নগর, গুৱাহাটী
মোবাইল : ০৯৮৬৪১০৬৩৩৪

দামহান
ৰূপা মাংখেইহান

Ou Dinor Ningsinge
By Sanjay Sinha
Edited by : Rajendra Sinha
Published by : Sunita Sinha, Udaynagar, Khanapara,
Guwahati, Cell : 09678931456
Price : ₹ 50/-

উৎসর্গ

বিশিষ্ট সমাজসেবী
রবীন্দ্র কুমার সিংহর
নিঃশিঙে



লেখকৰ কথাচুটি

মৰ পৰম পূজনীয় মামা দুৱাৰিকা সিংহ গিৰক বার অজ্ঞাওঁ কবি মদনমোহন মুখাৰ্জীৰ কৃপাই অনুপ্রাণিত অয়া মি অদম এগই গৰে থায়তেউ সমাজসেবা কৰানি মনাসিলু। মাত্ৰ ১৯৬১ সনে লোৱাৰপুৰা মালঠেপে মহাসভা আহান আহান কৰেসিলা উহানাত বিষ্ণুপ্ৰিয়া মণিপুৰীৰ মুৰব্বী গিৰিগিথানি আহেসিলা উতার লেৱসি দাৰি কৰিয়া মি নিয়ামপাৰা হাৰৌ অসিলু। উহান মৰ পইলাকাৰ সমাজসেবাহান।

লেইৱাৰ জতা সিরানিয়ে জীবিৰ সালে গৱেষ্ট নিকুলিয়া শিলঙে আয়া ২ নং বি. এস. এফে হমেইলুগা, মৰ খামখিয়ালে উহান এৱাদিয়া পিসেদে এস. এস. বিত গেলুগা।

ফৌজিৰ জীৱনৰ লগে গোপনীয় সংস্থাহান থকয়া ফঙয়া সমাজসেবা কৰানিতে থাক মানুৰ লগে তিলনিয়ৌ সহজহান নাগই। সুযোগ চেয়া চৰে চৰেদে তিলৌরিগা এহান হাৰপেয়া এখুৰুমতে আকপেইং ২ বসৰ থানা নাৱতাৱা, এহান মৰকা আশীৰ্বাদহান অইল। য়েপেইং জাউরিগা উপেইং আমাৰ মানু নিয়াম নাইলেউ ১৫-২০ গতে পাউরি। মাত্ৰ ডিব্ৰুগড়ে চাৰি পাচগ পেইলু।

উতার বিতৰে ডাকুলা মাখব গিৰক আকখুলাগ মণিপুৰী নাসা বাগাদিয়া নংশাগ পালয়া আসে। ঘন-ঘন বদলি অনা সত্বেও সমাজৰ লগে তিলয়া খানি আহান সেবা কৰে পাৱেসু এহান মৰ সৌভাগ্যহান।

মি উসাদে লেখকগৌ নাগই, উসাদে সমাজ সেবকগৌ নাগই মাত্ৰ আগেকাৰ স্মৃতি উতার নিংশিঙে এৱে ছৰকাং লেৱিকসৌ এহান ইকরলু। ডাত খেইতে তিতাউ লাগেৰ থুমউ লাগেৰ লেৱিক এহান পাকৰিয়া তিতাৰ বিতৰে খানিগাৱা হুম পেইলেতে মি নিয়াম পাৰা হাৰৌ অইলু। বানানৰ ভুল, শব্দৰ ভুল শৈনেই থাইতই, উতা নিজগুনে মাফ কৰে দিবাং।

যে যে গিৰিগিথানিয়ে না জিৱেয়া ইমা ঠাৱৰ কবিতা, গল্প, নাটক লেংকৱাং থেঙসি তানুৱাং পুন্নিংৱৌপা শ্ৰদ্ধা-ভক্তি কাংকররি। তাছাড়া জানা-অজানা লেখক-লেখিকা গিৰিগিথানিৰ প্ৰতিয়ৌ মৰ শ্ৰদ্ধাভক্তি থাইল।

সম্পাদকৰ কথাচুটি

মৰ বুড়াবা মহেন্দ্ৰ সিংহ গিৰক বিষুৱপ্ৰিয়া মণিপুৰী
জাতৰ মণি পালপাগ অয়া পালয়া গেলগা। তাৰে
নুৱাকৰে পৰিচয় দেনা না লাগেৰ। ঔ বংশজাত মৰ
নিঙৰ বাপক উসাদে ঔনাপাগ নাইলেউ খানিমানি
জনসেবা কৰিয়া গেলগা। বংশৰ মান-মৰ্য্যদা জিৎতা
কৰানিৰ নিঙে মিয়ৌ সমাজৰ আৰ-আৰ কামৰ
বিতৰে থায়া আপা-বপাৰ পথ উগদে ইলইং বুলিয়া
এৰে 'ঔ দিনৰ নিংশিঙে' লেৱিক এহানৰ সম্পাদনাৰ
গুরু দায়িত্ব এহান নিলুগা। এহানাং শ্ৰদ্ধেয় সঞ্জয় সিংহ
গিৰকৰ লেংকরা য়াৱিল পইলাকাৰ অকরাগ দিলু।
গিৰকৰাং মৰ আন্তৰিক শ্ৰদ্ধা-ভক্তি থোৱি। ভুল-ভ্ৰান্তি
অয়া থাইলে মি কনাক সৌ-এগৰে মাফ কৰেদিবাং।

সু-সংস্কার কু-সংস্কার যারি আকচুটি

বিশ্বের ইতিহাসে আসে সময় সময় মহাপুরুষ আকেইগ জরম অয়া সভ্যতার বিকাশের পথগ দেহাদিয়া চিরস্মরণীয় অয়া থাইলা, সভ্যতার পথে আনতে গিয়া কঠিন পরিস্থিতির মুখামুখি অসি, অত্যাচারীত, লাঞ্চিত, এমনকি প্রাণ আহুতি দেসি। প্রকৃতির কাঙ্ক্ষিত বসবর্তী অয়া মানু অন্ধবিশ্বাসের পথে নিয়ামপারা চলিয়া কু-সংস্কার গ্রহণ করেসি, ও কু-সংস্কার উহান নির্মূল করতে গিয়া কত জ্ঞানী-গুণী, মহাপুরুষ অসহনীয় যন্ত্রণা মুরগত পাতিয়া মানুরে সঠিক পথে নিয়া মানব সমাজের চিরশান্তির পথগ পালকরিয়া গেলাগা।

উচ্চ-শিক্ষিত আমেরিকা যুক্তরাষ্ট্রে এরে কু-সংস্কার এতা কম নাসিল। তানুর নজরে কালা মানুরে আলিপানি এমনকি কালা রং এহান তানুরাং অমঙ্গল বুলিয়া দরিয়া নেসিগা।

আফ্রিকার মানু টিকিগর সাদে কালা, এতারে দরে দরে নিয়া বিনা পয়সায় নিজের কাম কাজে খাটুইতে অসি। এরে অত্যাচার এহান দেহিয়া লেইরাপা গরর সৌগ আব্রাহাম লিংকণ ১৮৬০ সনে যুক্তরাষ্ট্রের প্রেসিডেন্টগ অনার লগে লগে দাসত্ব প্রথাহান বন্দ করে দিল। ও দিনেছ কালা মানু মুক্তি পেইলা। ও গিরকরে ঘাতকে মারলা। তানুর সমাজে কালা মানু নেই, উপেইত থায়তে থায়তে নিগ্রো বংশ আগ জরম অইল। তার রংহান অমাটিক নাউ কালা, নিয়ামপারা নাউ দলা, ও গিরক উগই কালা দলা মানু তঙাল কিস্তাউ নেই। কালা মানুর রকতউ রাঙা, দলা মানুর রকতউ রাঙা, দ্বিয় মানুর রকত অদল বদল অপারের। ডাঙর আন্দোলন আহান অকরল। অনেক দুঃখ কষ্ট সহ্য করিয়া শেষ জীবনে মহাপুরুষ উগ বিশ্বের শান্তির দূতগ হিসাবে ১৯৬৪ সনে বিশ্ব বিখ্যাত নোবেল পুরস্কার পেইল। ও মহাপুরুষ গিরক কিং মার্টিন লুথার, পৃথিবীর ইতিহাসে চিরস্মরণীয় অয়া থাইল। আমেরিকা যুক্তরাষ্ট্রে এবাকা কালা-দলার বেদাবেদ উহান মিমুত অইল। গিরক উগরেউ ঘাতকে মারলা।

বৃটিশ অধিকৃত দক্ষিণ আফ্রিকা বহু বসর পরে স্বাধীন অইল। অয়াতে কিতা অইব। কালা মানু ভোট দেনা নারতাই। ভোট দেনার জ্ঞান নাপাসি যদিও কালা মানুর বিতরে জ্ঞানী-গুণী অসি উতাউ ভোট দেনা বঞ্চিত অইলা।

মহাজ্ঞানী নেলশন মেন্ডেলা কালা মানুর ভোট দেনার অধিকার নিয়া ডাঙর আন্দোলন আহান অকরল। মেন্ডেলারে অনির্দিষ্ট কালরকা জেলে দিলা,

মেণ্ডেলাউ অনর, অটল, জেলর বিতরে থায়া আন্দোলনর ঢেউগ দিতে থাইল। ঔ ঢেউগ পৃথিবীর হাবি অঞ্চলে ফবইলগা। সমগ্র পৃথিবী গ্রাস করেসিলা অমিত শক্তিদর বৃটিশ, আমেরিকা ঔ হুং উগ আটকা নারলা। দিনে দিনে হুংগ বারতে আসে। আন্দোলনর প্রবল হুং উগই তানুরে বুরেয়া আহের। ঔ হুং উগ সহ্য করে নারিয়া দীর্ঘ পঁচিশ বসর পরে ভোট দেনার শিকৃতি দিলা। মেণ্ডেলারে স্ব-সম্মানে মুক্তি দিলা। ঔ মহাপুরুষ উগই এরে সুদীর্ঘ ২৫ বসর এহান জেলের বিতরে কিসাদে কাটােসে একমাত্র তাই হারপাসে। সমাজর মঙ্গলর নিঙে নিজর জীবন তুচ্ছ করিয়া সীমাহীন দুঃখ কষ্ট মুকসিহানল গ্রহণ করেসি তানুর মহিমা বর্ণনার উর্দে। উতাহ জিঙে কু-সংস্কার আমার ভারতবর্ষে আসিল, হেয়কগ মরলে ময়লকগরে চিতাউগত জিংতা জিংতা ঠেলাদিয়া পুরিয়া মারতারা। কালী ইমার মুঙে নিখুত মানু বলি দিলা, এরে জলন্ত অত্যাচার এহান হিন্দুরাং ধর্মহান অয়া আসিল। উচ্চ ইংরেজী শিক্ষা-শিক্ষিত রাজা রামমোহন রায় এরে কু-সংস্কার এহান বন্দ করানিরকা সমাজে প্রচার করানি অকরল। অন্ধ ওরা ধর্মী উতাই বিরুদ্ধাচরণ করতে থাইলা, বাধ্য অয়া রামমোহন লগুনে গিয়া আশ্রয় নিলগা। ঔপেই থায়া আন্দোলনর লেমগ না নিবেয়া পারিল নারিল চেষ্টা করল, তার পরিশ্রম ব্যর্থ নাইল দীর্ঘ ১৮ বছর পরে ১৮২৯ সনে তদানিন্তন ভারতর বড়লাট উইলিয়াম বেস্টিং এরে পার্শলিক কু-সংস্কার এহান কঠুর আইন প্রণয়ন করিয়া চিরতরে বন্ধ করেদিল এতদিনে রাজা রামমোহন রায় বুড়া অইল। তবুও মনর শান্তিতে ১৮৩৩ সনে পরলোকে গেলগা। গিরক মরিয়াও অমর অইল, ভারতর ইতিহাসে হনার মেয়েকে জলক জলক করিয়া থাইল। পণ্ডিত ঈশ্বরচন্দ্র বিদ্যাসাগর গিরকে দেহের যে নিঙলএতা সৌ-সুমারা নায়া কনাক বিদবা অইলে সারা জীবন এহান নিয়ামপারা অসুবিধার সম্মুখিল অইতারা, হিন্দুর মতে বিধবা বিবাহ নিষেদ এরে যুক্তিহীন প্রচলন এহান দেহিয়া য়ারি নিঙল লুহং করানি য়াকরের বুলিয়া তা নিজে য়ারী নিঙলপী আগ লুহং করল। কিন্তু সময়ের প্রতাপে সমাজে গ্রহণ নাকরলেউ কালক্রমে ঔ বাদা বিঘ্ন উহান না টিকিল। এসাদে করিয়া মানব জাতীর হিতার্থে হবা পথ দেহাদিয়া গেসিগা। রাজতন্ত্র যুগে রাজর্ষী অশোক কলিজ যুদ্ধর ভয়াবহ রূপ দেহিয়া জীবনে আর যুদ্ধ নাকরতউ বুলিয়া প্রতিজ্ঞা করল। ঔ দিনেস্ত শান্তির দূত হিসাবে দেশে দেশে ধর্ম প্রচারক দিয়া পেঠেইল। অশোক প্রজারে নিজর জিপুত মনে করিয়া বানানুংশি পাসিল। পৃথিবীর ইতিহাসে একমাত্র অশোক শক্তিশালী রাজাগ নিজর ইচ্ছায় যুদ্ধর পথগ এরাদিয়া শান্তি প্রেম মৈত্র্যের স্থাপন করে পারেসিলগ।

সাম্রাজ্যবাদী বৃটিশে সারা বিশ্ব এগ অধিকার করেসিল। সময় আহান তারতা বেলিহান না হমারগা। অর্থাৎ যেপেইত গেলেগাউ তার রাজ্য পেয়ার। তার বংশগত পুতক বেয়ক শক্তিশালী আমেরিকা ক্ষমতার লোভে লালায়িত অয়া দ্বিতীয় বিশ্বযুদ্ধে ১৯৪৫ সনে জাপানর হিরসীমা, নাগাসাকী শহরে আনবিক বোমা নিক্ষেপ করেসিল। শহর দ্বিয়গি সম্পূর্ণ ধ্বংস অইল। পৃথিবীর মানু হাহাকার অইলা ও ভয়াবহ রূপ উহান দেহিয়া পৃথিবীর হাবি রাষ্ট্র আমেরিকা যুক্তরাষ্ট্রে দুষারূপ করলা। উপায় নাপেয়া প্রতিকার স্বরূপ আমেরিকার আগ্রহে ও বসর ১৯৪৫ সনে পৃথিবীত শান্তি প্রতিষ্ঠার কামনার্থে রাষ্ট্র সংঘ (ইউ. এন. অ.) গঠন অইল। পৃথিবীর হাবি রাষ্ট্র ও সংঘ উগর সদস্য গ্রহণ করলা। ভারতবর্ষ রাষ্ট্র সংঘর গুরুত্বপূর্ণ সদস্য আগ।

কুন দেশ আহানে আরাক দেশ আহানরে আক্রমণ করে নারতই। পারমানবিক অস্ত্র অন্য দেশে ব্যবহার করে নারতই এমনকি নিজর দেশর প্রজাবর্গরউ অত্যাচার করে নারতই। ও সুযোগে ছরকাও রাষ্ট্র ভিয়েতনাম স্বাধীন অইল। পশ্চিম পাকিস্তানর অংগ রাজ্য পূর্ব পাকিস্তান সুষিত, বক্ষিত, লাক্ষিত সহ্য করে নারিয়া গণনেতা শেখ মুজিবুর রহমানর নেতৃত্বে স্বাধীন বাংলাদেশ অনার নিঙে প্রবল আন্দোলন করল। তদানিন্তন ভারতর প্রধানমন্ত্রী শ্রীমতি ইন্দিরা গান্ধীর পূর্ণ সহায়তায় ১৯৭১ সনে ১৬ই ডিসেম্বর স্বাধীন “বাংলাদেশ” সৃষ্টি অইল। রাষ্ট্র সংঘই শীত্ধতি দিলা। মুজিবুররে ঘাতকে মারলা।

রামায়ণর যুগে অযোধ্যার রাজা পুরুষোত্তম শ্রীরামে অত্যাচারী রাক্ষসরে মারিয়া দেশে সুখ শান্তি আনেসিল, এমনকি প্রজার আশংকা মিটানির সালে নিজর সহধর্মীনি সীতারে জঙ্গলে বান্ধিকী মুণির আশ্রমে থদেসিলগা। জাতীর জনক মহাত্মা গান্ধী ভারতবর্ষরে রাম রাজ্য হংকরানির চৌনা করেসিল। ঘাতকে মারলা, মরিয়ডি অমর অইল। ‘হা-রাম’ বুলিয়া ঠইগ লালইল।

সমাজ দরদী, সমাজকর্মী, কবি, সাহিত্যিক, বিমুক্তপ্রিয়া মণিপুরীর জাগরণ কুকিল গোকুলানন্দ গীতিস্বামী গিরকে পারিল ওনাপা অত্যাচার লাঞ্ছনা, অপমান সহ্য করেসিল। আকয়া দুঃখ পেয়া মাতেসিল “কার কাজে কাদুরিতা আকগয়ৌ হারনাপেইলাই হবার কাজে মাস্তেগাতে আরাক আহান নিংকরলাই।” এসাদে পরিস্থিতির বিতরে ও গিরকে আমরণ আমার ইমাঠার এহান প্রচার করিয়া গেলগা। এসাদে হাবি সমাজেউ আসিলা। মানব জাতির মঙ্গল কামনার্থে ধর্ম মহাপুরুষৌ বাদ না পরেসি। আমার ধর্মগুরু শ্রীচৈতন্য মহাপ্রভুরে জগাই মাদাইয়ে মুরগ ফাটাসিলা।

ভুবনেশ্বর সাধুবাবারে নবদ্বীপে পয়লা পয়লা নিয়াম হিন্দেসি। শ্রীমন্ত শঙ্করদেব রাজার রুবে পরিয়া শেষ জীবনে কোচবিহারে আশ্রয় নেসিলগা। যীশুখৃষ্টেরে ক্রুশবিদ্ধ করিয়া মারলা। শেষ পর্যন্ত তানুর জয়জয়কার অইল।

এবাকা আমার সমাজর য়ারি আকচুটি : মাততে গেলেগা আমার সমাজেউ কম বেসি ধর্ম-গোড়ামি, অন্ধবিশ্বাস আহানাত খানি বুরদিয়া আসি। আগে আমার গাঙ-গরে পাহাংপার চাপাল দেনা এহান ব্যাধিহান অয়া আসিল। পাহাংপাই দরলে হজকে কানা নাইতই, চাপাল দেনা লাগতে, এহানাত রাজার পুতক আগই দিলেতে সইনেই বালাইতই। প্রকৃতির নিয়ম মতে য়েপেই ডাঙর গাছ-গাছড়া থার উপেইত পানি পুলর ও পানি উতা ফুটি ফুটি অয়া তার যানার পথেদে য়ারগা। কিতাপারা হারনাপেয়া ও লকর পানিহান লালইলে পাহাংপাই দরল। যুগর প্রতাপে পাহাংপা গিরগউ দাপদিয়া গেলগা। এবাকা চাপাল উঠিল। আমার ইমাগাসি কনাকে শৌরে কেঙগই কামারতই, হাওগই খেইতই বুলিয়া ডর দেহেয়া গুমজাদিলা নাইই বারাদে যানা নাতলা। কালর বিবর্তনে আজিকালিকার শৌরে উতা মাতিয়া ডর দেউহেয়া গুনজা দেনা বা আটক করানি সম্ভবপর নার। এবাকা ইংরেজিল গৈগ অসি যুগ এহানাত কেংগ, হাউগ হার নাপেইতার। হারপানির প্রয়োজনউ নেই। আগেকার ইমাগাসির বার আজির ইমা গাসির বহুত তঙাল অইলা।

পিঠির বাহাছপার তলে কালাদৌ আগ আসে। চিকচিকি বারবাজিত গেলেগা দরতই। ইমার কথা লয়া ডরপেয়া নাগেলাংগা। এবাকাউ ও বাহাছপা উতা আসে; কিন্তু কাল দৌ উগতে বেলেয়া গেসেগা। কালর প্রতাপে কাল দৌ নেইলা দলা দৌতে আসি। হবা আহান অইল। বিবুহানরে আমি চেরৌ বুলিয়ার, চেরৌর পাচদিন গরেছ নিকুলানি নারলাং, বসরহান লমইলে নুবা বসরর দৌর লগে পটাপটি করতার। গরেছ বারাদে গেলেগা ও দৌ উতাই দরতই, দৌর ডরে দশ-পচিশ খেলেয়া থাইলাং। দেশ আহান, মাটিউ আকতা, হাবা পানিউ আকতা। বৈরাকহান লালয়া ব্রহ্মপুত্রর পারে অইলে উল্টা য়ারি অর। বিবুর পাচদিনতে থাক পুরা বৈশাখ মাহান দরিয়া গাঙ লপুক বুলে বুলে বিছ নাসা এলা দিয়া আসামগ খলপি খলক করতার। তানুর দেহা দেহিয়ে বরাক উপত্যকাত খানি আহান তঙাল অইল। কাল দৌরে ডরপানি এবাকা নেয়ইল। জন্ম, মৃত্যু, বিবাহ এরে তিন এহান সমাজ লাগের। নিয়ম নিতি কঠিন অইলউ বিশৃঙ্খলা অর। এতা উতা চিন্তা ভাবনা করিয়া আমার পূর্ব পুরুষ সমাজহান শৃঙ্খলা বদ্য অয়া চলানির অর্থে নিয়ম নিতি নিরদারন করিয়া গেসিগা। ও নিয়ম নিতি উতা উলট, পালট করিয়া আজির যুগে আমার

সমাজে বিশৃঙ্খলাহান দেহাদেসে। বিষুপ্রিয়া মণিপুরীর নিয়মনিতি নিয়ামপারা সহজ-সরল। বয়জ্জের প্রতি শ্রদ্ধা ভক্তি দেনা আমার জাতর বৈশিষ্টহান, বুজন গিরক আগই যদিউ নাগই কথা আহান মাতিয়া থার ঔ গিরক উগরে সহজে না বুলানি এহান মাতানি হিনপেয়ার। পুরুহীত গিরকরেউ শ্রদ্ধা করিয়ার, আগে আমার গাং গরে গুরু মইস পালানি এহান আমার প্রথাহান এহান আৰ্য জাতিরাংত গ্রহণ করেসি। প্রাচীন কালে রূপা পয়সা নেয়সিল গরে পালা পশু বিশেষ করে গুরু অদল বদল করিয়া জিবিকা নির্বাহ করেসি। ঔ প্রথমতে বিষুপ্রিয়া মণিপুরী খেতিউলা থকয়া গুরু-মইষ পালিয়া আইতারা। মানু আগ পরলোকে যানার আগমুহর্তে দান ধর্ম নিয়ম আহান করতারা উহানাত ধন পয়সা নেয়সেহান থকয়া গুরু আগ দান করতারা ঔ গুরুগর লেজগত দরিয়া মহা পাপীগ অইলউ মরলে বৈতরনি গাঠহান লাল পারতারা। ঔ বৈতরনি লালইলে স্বর্গলোকে থারগা। এগদে বার আমার পালা নাম সংকীৰ্তনে মৃত আত্মাউগরে পুন্মাক বৃন্দাবনে যুগল চরনে থইতারা। কতি হবা লেইতেরেংহান, ঔ দিনে ভাবক, বৈষ্ণব, থপু হাবি একিন অয়া মৃত আত্মার শান্তির কামনা করতারা। মনর দুঃখ জালা যজ্ঞনা হাবি ককয়া যারগা। এসাদে বিধি ব্যবস্থা অন্য কুনো জাতে নেই। এরে পালা নাম সংকীৰ্তন এহানল আমার জাতহান যুগ যুগ দরিয়া পালয়া আসি।

পরলোকে গেলগা উগরেল খরচ অনার য়ারি আকচুটি : মরাগ উঠানহানাত নিকালেয়া উরাদারা গর আগ হংকরিয়া মেস্তমকা থয়া হিনানির ব্যবস্থা করিয়ার। হিনাদেনার পিসে নামসা পিদাদিয়া এহান আমার জাতর কৃষ্টিহান।

এখুরুম হিনাদেনার পরে নুবা ফুতি পিদাদেনা লাগের বুলিয়া কুনো কুনো গিরিগিথানীয়ে মাস্তারা। থপু গিরক উগ মনর শান্তিরকা গরে থাক নাথাক নুবা ফুতি আনতে বাদ্য অর। অথচ ঔ ফুতি উতা শ্মশান হানাত থদিয়ার, কথায় আসে আইতেউ ছদালা যিতেগাউ ছদালা। গরর পোষাক পিদা দিলে খরচহান কমর এহান হারপা নারলাং।

আরাক খরচ আহান : গর সেঙনির দিনে নাপিত উগর তার ন্যায্য পয়সা দেনার পরেউ আরাক সিকদা আহান দেনা লাগের। হারৌবরউ নাপার নাপিত উগউ আমার মরণ জরমর সিকদা পেইতে পেইতে আমারাংত জিঙে হারপার, কিতাপারা আচাং আচাক কমইলে দাবি করেয়, এহান কিসাদে বিধানহান, নাপিত উগই কুনো মতেই আপুষ নামানের, থপু গিরক বাদ্য অয়া জিনিষ উতা সুকরিয়া দেয়। সিকদা উহানর খরচউ কমহান নাগই। অথচ

কর্মহানল তীর্থত নিলেগা নাপিতগর সিকদার প্রয়োজন নেই, মুর খুরেয়া ন্যায্য পয়সা উহানি দিলে লমর, সিকদার কুনো বামেলা নেই। সিকদা হানর ব্যাপারে থপু কিরকে চিন্তা করে পারের।

এখুরম শয্যাহানর য়ারি আকচুটি : আমার শয্যা এহান খরচ প্রায় শ্রাদ্ধর পালা কীর্তন আহানর সমান অর। ফাম দুহান লাগের এহানাত নুঙেইপা গিরকে নুবা নুবা জিনিস লয়া কাতকরের। নুবারের গিরক উগই বামুনগরে পয়সা খানি মানি দিয়া জিংতা অইল। কিন্তু সিকদাহানর ব্যাপারে চেইক — সিকদা তিনহান দেনা লাগের কুরু গিরক উগর কুনো খবর খোনচা নেই, এমনকি নাম কাকরতে কুরুগ কুংগ মাতে নারতারা। ও কুরু গিরকর ফাম সিকদা দিতারা এতার খরচ এহান নেই থপু গিরক উগউ দেনা লাগের। আরাকউ য়ারি আহান নুবা করে চম্বল জুরা আহান দেনা অকরলা এহান আগেদে নেয়সিল। অবশ্য খরম আসিল।

ঘটগর য়ারি আকচুটি : পঞ্জিকাহানাত মাতেসে ঘটগর পাচসিকা, লগে নারিকল, কলা, ধান এতা এতা কুনো পুরহিত গিরক আগই মণ্ডলীগর ঘটগত ৫১ টাকা দেনা লাকতই বাকি গটে ৫ টাকা। অবশ্য আরাক পুরহিত গিরক আগই মাতেরতা প্রতি গটে ৫ সিকা এবাকা সিকিগ নেই হানতে ১ টাকা দিলউ চলের। কি হবা কথাহান, হাবি বামুন সমান নেই। এহানাত বামুনরে দোষ দেনা থক নেই, থপু গিরকে সামর্থ অনুযায়ী পুরহিতগর লগে বিবেচনা করিয়া ব্যবস্থা করলে হবা। অন্ধ বিশ্বাসে গিলিয়া সম্পতি বনদক দিয়া কর্ম করলে মিয়াঙে মাতলা কথাহান আসে? “মরার লগে জিতাউ মরা।” মরাগর লগে জিংতাগউ মরানি। এহান সম্পূর্ণ হায়হান।

শয্যাহান কাতকরিয়া শ্রাদ্ধ নাকরলে মনহানাত সাংনাপাহান নার, ডাঙর চিন্তা আহান গারিগত থাপরেরগা। এরে শয্যাহানর অমাটিক কইনা কইঠেক নাকরিয়া কম খরচে কম সময়ে লমকরিয়া পালা নাম সংকীর্তন অকরলে মূর্তীগ পালকরিয়া বিজয় তথা নাম কাকরানি পেয়া ভাবক, বৈষম্য, থপু হাবিউ মনপুত অইতারা। উরাদারা করিয়া লমকরলে কর্মহান সুবিধা নার। মনর আশাউ নাপুরের।

এতা এতা জামেলার সালে এবাকা ১২ দিনর বিতরে কাদ্দাত আসে নবদ্বীপে নাগিয়া কামাখ্যা ধাম কিবা বশিষ্ট ধামে গিয়া শ্রাদ্ধ কর্ম করানি অকরলা। নবদ্বীপে জানা এহান পূর্বাচরনষেচ চলিয়া আসে, এবাকা উহানউ বাদ পরতই। এসাদে অইলে আমার জাতর মেরুদণ্ড স্বরূপ পালা নাম

সংকীৰ্ত্তনহান রসাতলে জিতইগা, জানাউ অকরল। এহান বিষ্ণুপ্রিয়া মণিপুরী জাতীর ডাঙর খতি আহান। এবাকাই আমার সমাজর মরুখি বুদ্ধিজীবি চিন্তা করিয়া ব্যবস্থাহান করলে হবা অইতই নতুবা এরে জনজাল এতাই চলের ঘাট উহানউ বন্ধ অপরতইগা।

দান ধর্মর নিয়ম এহান যুগর তারনাই প্রায় নেয়জারগা। এমনকি গাঙ গরেদেউ নেয়ইল বুলুউ যাকরের। হাসপাতালেত মরাগল সিদা গরে আইতারা নাহয় শ্মশানে নিতারগা। উপেইত হিনাদেনা যাকরের কিন্তু গুরুগল দান ধর্ম করানি নাইতই। কিহানতে অইতই? এলা হানাত আসে “নিজর কর্মফল আগে আগে জারগা, ফল অনুগত জীব পিসে পিসে পারগা।” এহানেই চিরন্তন সত্যহান। আগে ইসালপা ডাকুলারে ফুতিল প্রেম করলা পিসে আলথক করে দিলা, পরিবর্তনশীল সময়র লগে উহানউ পরিবর্তন অইল, এবাকা পয়সাল প্রেম করতারা এহান হবা আহান অইল। শ্রদ্ধত অন্ন বুজনর ব্যবস্থা নেয়সিল। চিরা, কাপক, মদুর, সেলকম দিলা। বিজয়র পরে কনাক শৌরে ১পয়সা, ২পয়সা, আনাহান পেয়া দান করলা। এবাকা উহান উঠিল। সাকতি বুলিয়া মাতে নারিয়ার। এবাকা অন্নবুজনর ব্যবস্থা অইল। সারাদিন এহান নামসংকীৰ্ত্তন হনিয়া ভাবক বৈষম্বরে অন্ন বুজন নাকরলে সেবা উহান পরিপূর্ণ নার।

পরিবর্তনশীল যুগর লগে তাল মিলেয়া আরাক আহান আনে পারিয়ার। দেবকর্ম, দুর্গাপূজা, যজ্ঞ, রাসলীলা, শ্রাদ্ধ, লুহং হাবি তাত পালা নাম সংকীৰ্ত্তন এহান আসে অথচ রাস্কুৱাল রাস এহানাত বাদ পরেসে। এবাকা রাস্কুৱাল রাস এহানাত পালা নাম সংকীৰ্ত্তন এহান আনিয়া আমার কলা কৃষ্টিহান চাংখল করানির প্রয়োজন আহান পরিল।

পিতৃপক্ষর সিকদার য়ারি আকচুটি : সিকদাহান পরম্পরাগত অয়া চলিয়া আহের। হাপ্তা ১০ দিন আগেত্ব ইমা ইন্দল পারিলমাহি যোগার যজ্ঞনা করতারা। দিন উহান নিঙলপি হাবি মন্দিরে তিলয়া আগরে আগই য়ারি পরি দিয়া, নুৱা মানুর লগেউ পরিচয় অয়া পেট বুজিয়া হারউপার মেলে পরতারা। আমার আপা বপায় কতি হবা ব্যবস্থাহান করেদেসি। সারা বসর এহান ইমা ইন্দল সংসারর কামল ব্যস্ততাত থাইতারা, অন্য কুনো পারবনউ হাবিগই জানা নারতারা গেলেগাউ আজিকার দিনর সাদে বাইসাওয়া য়ারি পরি দিয়া নারতারা।

আরাক নুৱা নিয়ম আহান আহিলপারা— দামি দামি সিগারেট বিড়ির পেকেট লগে দিয়াশলাই আগ সিকদা হানাত হাজেয়া দিতারা, উহান দেহিয়া ইমা ইন্দল আগরে আংকরলু, বিড়ি সিগারেটউ দেনা যাকরের থাং? উত্তর— আমার উগই ভাত নাহেইলউ বালা সিগারেট পিনা লাকতই উহানে—

প্রঃ- সিকদাহান দৌরাং কাতকরিয়া, দৌরে সিগারেট বিড়ি নাপিতারা, কিসাদে দিলেতা? কানা অইলতা?

উঃ- মনার জিনিষহান দেনা থক।

প্রঃ- মাতানি থক নেই— আমি হিদল সারা ভাত খানা নুঝারিয়ার, যার ফলে আমারে “হিদল খউরা জাতহান” বুলতারা থাংতে হিদল কাতকরানি থকর। প্রশ্ন উত্তর লমইল।

এহান লক্ষ্য করিয়া পুরোহিত গিরক বার সিকদা বাগেকুরা ইমা ইন্দলে বিড়ি সিগারেট থাইলে আলথক করেদেনা নাইলে বিড়ি সিগারেটর সমান নেশা মদর বোতলউ দিতাই। নিংশিং অনার কথা আগেদে বিড়ি সিগারেটর প্রচলন নেয়সিল। ইদানিং অসেতা, অবশ্য হাবিগই নান্তারা—

আরাক নুঝা ডাঙর খরচ আহান সমাজর বিতরে জাতেয়া হমেইলগা— নিঙল আগর লুহং আহানাত তাংখা হাজার হাজার নাগই— এবাকা লাখ লাখর য়ারিত আহিল। আগে নিঙলগর বারাদে বর পক্ষত খরচ বাবত রূপা পয়সা দেনা আসিল, কালর প্রতাপে উহান পালটেয়া উল্টা বর পক্ষরেহে দেনা অকরলাং, এরে প্রথা এহান আর আর জাতরাংত নকল করিয়া আনানি অইল।

এখুরুম মন্দিরে নাগই বা নিজর উঠান গরেউ নাগই সিদাসিদি ইউরোপর স্টাইলে হংকরেদেসি বিবাহ ভবনে লুহং করানি এহান ডাঙর ইজ্জতহান বুলিয়া আমারাং হমেয়া হদেইল। আতে কুপাঙ দরিয়া লাইন পাতিয়া ভাত খানা লাকতই। বয়া খানারকা দেসি চেয়ার উতাউ পরিমাণে কমসে, উবা অয়া খা নাইলে নাহেই। এরে ব্যবস্থাহান সম্পূর্ণ ইউরোপরাংত হাসুরলাং, শত চেষ্টা করিয়াউ নুঝারা এহান বালা অনার আশা নেই। অবশ্য গাঙ গরেদে এবাকা এরে ব্যবস্থা এহান নাসে। আইতারা গিরিগিথানী উতা খেয়া পিয়া নিজর নিজর গরে জিতারাগা। হায় কথাহান— দুরেই দুরেইত আয়তারা থকয়া ডিলয়া জানা নিয়ামপারা অসুবিধা অর, এগদে পালাহান অকরতে কুনো ভাবক, বৈষম্য আকগৌ নেই, মাত্র বর-কন্যার মানু উতারেল কুনোরকম লুহংহান লমকরানি লাগের। এতা এতা বিশৃঙ্খলাই হাবিতা সামকরিয়া কামাখ্যা মন্দির, বশিষ্ট মন্দিরে কম খরচল লুহং করানি অকরলা। এহান জাতর সাংস্কৃতিক কলা-কৃষ্টি ডাঙর খতি আহানাত লেপইল।

গুৱাহাটীর আমার মন্দিরে কাদা বারাদেউ কমবেশী ভাত খবানির ব্যবস্থা আসে, এহানাত জাত বেজাত খানা পারতাই, খেয়া পিয়া আমার পালা কীর্তন

এহানউ চেয়া নুঙেই করে জানা পারতাই আমার সংস্কৃতি, কলা-কৃষ্টি হানউ
থাইল। ইজ্জত হানউ বাড়িল খরচ হানউ নিয়ামপারা কমইল।

মি সমালোচনার যারিত নাজাউরিগা। বিবেচনার যারি কতহান সমাজরাং
কাতকরলু।

১। নাপিতগর সিদ্ধা— মরণ জরনে দেনা থক কিনা?

২। শয্যাহানাত ফাম দুহান নায়া আকহান দেনা থক কিনা?

৩। শয্যাহানাত সিদ্ধা তিনহান নায়া আহান দেনা থক কিনা?

৪। শয্যাহানাত চপ্পল জুরাহান দেনা থক কিনা?

৫। সিদ্ধাহানাত সিগারেট বিড়ি দেনা থক কিনা?

৬। গৌহাটির হাবি লয়াত মন্দির মালঠেপর ব্যবস্থা অইল এহানাত লুহং
এহান বিবাহ ভবনে নাকরিয়া নিজর নিজর মান্দিরে করলে সমাজর হবাহান
অইতই বুলিয়া আশা করে পারিয়ার।

গজর এতা বাদেউ সমাজর উন্নতিকল্পে পুংখানুপুংখাভাবে বিচার বিবেচনা
করিয়া সম্পাদক গিরকরাং ইকরিয়া দেনার নিঙে সমাজরাং হেইচা কতকররি।
পরবর্তী সংখ্যাত লিংখাত করানি অইতই। শ্রদ্ধাবান গিরক গিথানক গাররাপেই
পুরিজেলেই হাবিরে ভক্তি কাত করিয়া পয়লাকার সংখ্যা— “ঔ দিনর
নিংশিঙে” প্রকাশ করানি অইল মেয়কর ভুল, বানানর ভুল, পারেঙর ভুল
থাইলে অবশ্যই মার্জনা করে দিবাং।

শিলঙর পইলাকার অধ্যায়

কলা সংস্কৃতি ভাষা, ধর্মহান চেতক দরিয়া থসিতা থকয়া আমার জাত এহান জিৎতা অয়া আসি। আৰ্য জাতীয়ে আমারে গন্ধৰ্ব বুলিয়া মাতেসিলা। তানুর সাদানে নিয়ামপারা শিকিত নাইলৈরগায়ৌ নৃত্য কলাই পারদর্শী অসি বুলিয়া য়াকরেসি। আমার নৃত্য কলা এহান মণিপুরর হাবা-পানি প্রাকৃতিক চরিত্রহানর গতি বিধিল সৃষ্টি অসেহান। হাবি দেশেউ হাবি জাতর নিজর নিজর এলা নাসা আসে। মণিপুরর এলা নাসা সম্পূর্ণ তঙাল। স্বর্গর পরী লকতাক হুদর পারে আয়া নিক্কা নিক্কা নাসিয়া হারৌ পিয়ম করেসিলা বুলিয়া গন্ধৰ্ব জাতীয়ে বিশ্বাস করেসি। কৈলাশেশ্ব শিব দুৰ্গা আয়া তাণুব নৃত্য করিয়া খেলা ধূলা করেসিলা বুলিয়াউ মাতেসি। ঔতা ঔতা চিন্তা ধারাল বাস্তব আকারে অয়া পিসে পিসে মণিপুরর নৃত্য কলা সৃষ্টি অসে। আৰ্য জাতীরাং এসাদে উন্নত মানর নৃত্য কলা নেয়সিল। এরে নৃত্য কলা এহানর লগে আমার সংস্কৃতি হানউ জরম অইল। নাসাহানর লগে এলাহান থাইল, এলার মাধ্যমে ভাষার প্রকাশ পার।

মহাভারতর যুগে উত্তর পূৰ্বাঞ্চলর লগে যোগসূত্রর অকরাগ অসে। ক্রমাধারে কামৰূপ, প্রাগজ্যোতিষপুর (গৌহাটী), শোণিতপুর (তেজপুর), প্রমিলা রাজ্য, (জন্তিয়া রাজ্য) হিড়িম্ব রাজ্য (উত্তর কাছাড়) নাগা রাজ্য, মণিপুর রাজ্য, এরে রাজ্য এতার লগে আৰ্য জাতির বৈবাহিক সম্বন্ধ নিয়া সু-সম্পর্ক গড়িয়া উঠেসি।

প্রাগজ্যোতিষপুর রাজ্য এহান প্রাচীন কালেস্ত জ্যোতিষ বিদ্যায় খ্যাত অসিল বুলিয়া এরে নাং এহান পাসে।

প্রাগজ্যোতিষপুরর পাংকালপা রাজ্য ভগদত্তর জিলক ভানুমতি, হস্তিনাপুরর যুবরাজ দুর্যোধনর লগে বৈবাহিক সম্বন্ধ থকয়া কুরুক্ষেত্রর যুদ্ধে ভগদত্তই আস্তির রথ সৈন্যল যোগদান করেসিল। ঔ সৈন্য উতার বিতরে কিরাত (কোল, ভিল সাওতাল কুকি) ব্রাহ্মা, চীনর সৈন্য আসিলা বুলিয়া মহাভারতে উল্লেখ আসে। বুড়া ভগদত্তর যুদ্ধ কৌশল বার অস্ত্র শস্ত্র দেহিয়া, অর্জুনে ডরপাসিল। পঞ্চপাণ্ডবেরে মারানিরকা অব্যর্থ বৈষ্ণবাস্ত্রগ এরা দিল। ভগবান শ্রীকৃষ্ণই পঞ্চপাণ্ডবেরে রক্ষা করেসিল। ভগদত্ত এতই বুড়া অসিল তার পিচুমগ লাময়া আহিথম জিপেসিল। কপাল হানাত খুন্তেই আহান বাদিয়া

আহির পট্টিহান মেলিয়া থসিল। ঔ পট্টি উহান অৰ্জুনে কারগল কাপিয়া বেলাদেনাই ভগদন্তর আহিথম জিপিল। ঔ হেরউগত অৰ্জুনে ভগদন্তরে বধ করল। ঔ প্রথা উহান থয়া আসামর মানুৰে আজিউ খুন্তেই আহান বেয়েয়া মুরগ বাদিয়া থইতারা। এহান ঔ দিনেছ চলিয়া আহেসে রীতিহান। কামে কাজে এলা নাসা বিছ নৃত্য এরে খুন্তেই এহান ব্যবহার করতারা। উহানরে আমি আসামী গামুচা বুলিয়ার।

শোণিতপুর এবাকা (তেজপুরর) রাজা বানাসুরর আকখুলি জিলক উষার লগে দ্বারকার রাজা শ্রীকৃষ্ণর নাতিয়ক অনিরুদ্ধ প্রণয় মিলন অসিল। বান রাজা অপমান মনে করিয়া অনিরুদ্ধরে বন্দি করিয়া বন্দি শালা উগর চারিবারাদে ছি লাগেয়া থসিল। ঔ বন্দি শালা উগর নাং অগ্নিগড়। ব্রহ্মপুত্রর পারে উচ টিলাগত এবাকাউ অগ্নিগড় উগ আসে। বাদ্য অয়া শ্রীকৃষ্ণ নিজে বান রাজারে আক্রমণ করল। বান রাজা শিব ভক্তগ অসিলতা থকয়া ভক্ত বানরে রক্ষা করতে আয়া শ্রীকৃষ্ণর লগে স্বয়ং শিব অস্ত্রল যুদ্ধত নামিল। ঔ যুদ্ধ উহানর নাং “হরি হরের যুদ্ধ” বুলিয়া খ্যাত অসে। এবাকাউ তেজপুর শহরে মহা ভৈরব মন্দিরগ বিদ্যমান অসে। ঔ মন্দির উগত উষায় নিক্কা নিক্কা শিবরে আরাধনা করেসিলি। তেজপুর শহরগত বান রাজার স্মৃতি চিহ্ন শিল শিল অয়া আসে। এসাদে করিয়া সুদূর পশ্চিম ভারতর লগে পূর্ব ভারতর মহা মিলন ঘটেসে।

মণিপুরর রাজা চিত্র বাহনর জিলক চিত্রাঙ্গদার লগে তৃতীয় পাণ্ডব অৰ্জুনর বৈবাহিক মিলন অনাই বক্রবাহন জরম অইল ঔ সম্পর্কল আমি অৰ্জুনর বংশ বুলিয়া পরিচয় দিয়ার।

এরে আমার মণিপুর এহান মহাভারত মণিপুর উহানেই প্রমাণ অইল। অনেক ঐতিহাসিক উড়িষ্যার মনফুর উহানরে মণিপুর বুলিয়া ধরিয়া নেসিগা। ২০১১ সনর খামতলে প্রসিদ্ধ সিনেমা নির্দেশক বি. আর. চোপরার সিরিয়েল মহাভারতর উহানতে চিত্র বাহনর জিলক চিত্রাঙ্গদার চরিত্রহান হবা করে ফুটেয়া দেউহেইলা। লগে নাগ রাজার জিলক উলুপীর চরিত্রহানউ দেহেইলা। উহানাত মণিপুর, নাগভূমি প্রমাণ অইল।

এরে য়ারি এহান ৫০ বসরর গজে অইল ঐতিহাসিক গবেষক মহেন্দ্র সিংহ গিরকে প্রমাণ করেসিল। মণিপুরর প্রাচীন ইতিহাস লেরিক উহানাত প্রমাণ করেসিল।

বক্রবাহনর রাজত্ব কালে আমি বিষ্ণুপ্রিয়া অইলাং। ভাষা হানেই আৰ্য্যর ভাষা সংস্কৃতর লগে তিলয়া নুবা ভাষাহান পেইলাং।

নৃত্য-কলা সংস্কৃতি তত্তাল রূপ আহন অইল। কলিযুগে গৌরাজ মহাপ্রভুর বৈষ্ণব ধর্ম এহান গ্রহণ করানিয়ে আমারতা উন্নতির পথ আগ নিকুলিল।

উন্নত বাংলা ভাষার লগে আমার ঠার এহান নিয়ামপারা তিলসেতা থকয়া বাংলা ভাষার ভক্তি মূলক এলা, ভক্তি মূলক গ্রন্থ আমারাং সহজ অয়া হৃদিগত ফবইলগা। অওবার বাগনেত্ব অয়া বাংলা ভাষা অধ্যুষিত অঞ্চলে থানাই আমার ইমাঠার এহান মিমুত নাসে অথচ মণিপুরে থাইলা উতা নিজর ঠারহান পাছরলা, এবাকা তানুরে বিষ্ণুপ্রিয়া মণিপুরী বুলিয়া খেই করানি সম্ভবপর নাইতে। বাংলা ভাষা, উড়িষ্যা ভাষা, আসামী ভাষা, বিষ্ণুপ্রিয়া মণিপুরী ভাষা এতা সংস্কৃতিত্ব জরম অসে।

পরে পরে ধর্মীয় সাধু পুরুষ জ্ঞানী-গুণী, কবি সাহিত্যক, ইসালপা, ডাকুলা, জরম অয়া আমার ধর্ম ভাষা নৃত্য-কলা সংস্কৃতিহান পালকরে দিলা।

আর্য জাতীয় সংস্পর্শে অয়া আর্য ধর্ম হানউ গ্রহণ করলাং লগে গজ্জ্বর্ষ ধর্মহানউ থনা পারলাং। আপকপা হমাদেনা, লামর দৌ হমা দেনা বারন হমা দেনা। খরান করলে ইমাগাসি রাতি লপুকে ফুতি বেলেয়া বরণর এলা দিয়া বরণ দেবতারে ডাকলা। আমি মণিপুরে খুমেল লেইপাকে আসিলাংতা থকয়া এলাহান— খুমেলর মাটি হকেইল—বৌরাজা বৌবরণদে, হাঁগর ভপা জলডুবা, বাঁধগ বাগিয়া বেললেতা, দিনহান কালা করলেতা। হুতুমেউ ঔ দিনে বরন দিল। অবশ্য আজি কালি বরণ দেবতারে ডাহানি উঠিল, খুপা খুসেই এবাকাউ আসে।

বঙ্গ বাসীর লগে থানাই বাঙালীর জাতীয় উৎসব দুর্গাপূজা উহানউ গ্রহণ করলাং।

নৃত্য কলা আমার সাংস্কৃতি হান থকয়া মণিপুরর রাজর্ষী মহারাজ ভাগ্যচন্দ্রই তার একমাত্র জিলকরেল মহারাস হান করেসিল বুলিয়া রাজধারীয়ে বলন্তিগ দিতারা “রাস আরম্ভিল ভাগ্যচন্দ্র মনোহর” ঔ দিনেত্ব রাসলীলা এহান আমার হাবির গজ্জ্বর্ষ ধর্ম অনুষ্ঠান হান অয়া নেপইল। নাসাহানর লগে এলাহান দিয়ার এলা উহানেই উন্নতমানর ভাষাহান প্রকাশ পার।

বিশ্বকবি রবীন্দ্রনাথ ঠাকুর সিলেটে গিয়া দিনে রান্ধুবাংল, রাস, সেনদাত পালা নাম-সংকীর্তন (অধিবাস) সারা রাতিহান মহারাস লীলার নাসা, ভঙ্গী, ডাকর পুংলেংল এলার ভক্তি ভাব রস দেহিয়া ভক্তি ভাবে বিবুর অসিল। ডিল নাকরিয়া তার শান্তি নিকেতনে মণিপুরী নৃত্য এহান শাস্ত্রীয় নৃত্য হিসাবে

স্বীকৃতি দিয়া বিষ্ণুপ্রিয়া নৃত্যাচার্য কলা গুরু নিযুক্তি দেসিল। তার এলা রাজধারীয়ে আনেসি। “রোদন ভরা এ বসন্ত” “কৃষ্ণর শান্তি সুন্দর কান্তি” এতা এবাকাউ কলিকাতার দূরদর্শনে চিত্রাঙ্গদা নৃত্য হাদি হাদিত দেহেইতারা। রবীন্দ্রনাথ ঠাকুররে আমি খালী, তার জন্ম দিবস আমি তঙাল করে পালন করানি থক নতুবা তার অবদান এহান নুবা প্রজন্ময় হারনাপেইতাই।

উতার নিংশিঙে থয়া আমার মানুর দুরেই দুরেই শহরে গিয়াউ ধর্মভাষা সাংস্কৃতি চেতক ধরিয়া মালঠেপ মন্দির হংকরিয়া পালয়া আসি।

নিয়াম দুরেইত নাজিকগা— শিলং শহর উত্তর পূর্বাঞ্চলর রাজধানী আসিল। ভৌগলিক অবস্থানে শিলং বিষ্ণুপ্রিয়া মণিপুরী বসতি অঞ্চল কাছাড়, ত্রিপুরা, সিলেট লয়ার কান্দাত অইলেরগায়উ আজির সাদানে যুগাযুগ ব্যবস্থা নেয়সিল। রাজধানীহান থকয়া হিনপেয়াও জীবিকার সালে দাপায় দাপায় আয়া অইতে আসি।

১৯৬১ সন ভাষা আন্দোলনর পরে লুবারপুয়া গাঙে নিখিল বিষ্ণুপ্রিয়া মণিপুরীর মহাসভা আহান আহ্বান করানি অসিল। ঐ মহাসভা উহানাত কাছাড়, ত্রিপুরা, ভানুয়াস, সিলেট, তথা রাজধানী শিলং গুৱাহাটীর মুরুষী হাবি গিরিগিথানী পুলসিলা ঐ গিরিগিথানীর পথউগ ইলয়া মিয়ৌ শিলঙে গিয়া ইরেলগ করে নাঙ পালপা মুরুলী গিরকর গরে হমেইলুগা। গিরকর মালক আঙউবি গিথানক ধর্মচেলপিগ বাপক তারাকান্ত দৌর ভক্তগ আসিল। সময়ে তানু দৌর থয়া পেইলাগা।

শ্রদ্ধেয় মুরুলী দাদা গিরকরাত কতহান য়ারি খংকরিয়া হরপেইলু।

১৯৪৫ সন পইলাকার যাত্রীগ সিলটর চন্দ্রশেখর সিংহ গিরকর লগে বাস্তিউজা মুরুলী গিরক শিলং শহরর খইতুগ পুলিশ বাজারে জ্ঞান দোকান আগ দিয়া ব্যবসাহান অকরেসিলা। চন্দ্র শেখর বয়স অনায় তেজাম দৌ অইল, মুরুলী গিরক শিলংর পইলাকার খুটিগ লেপয়া থাইল। ১৯৪৫ সনর আশ্বিন মাহর দুর্গা পূজাহান বহেয়া অকরাগ দেসে ঐ পূজা উহান মণিপুরী দুর্গা পূজা বুলিয়া শিলং শহরে নাং পালসিল। ক্রমান্বয়ে আজি পেয়াউ পূজা উহান চলিয়া আসে। ঐ দিনে গাড়ী গুড়া কমসিল। বিসর্জনর দিনে লেম্পালে করিয়া জেল রোডগর চিপা পথ উগদে আনিয়া পলো সড়াহানর পারে থয়া আমার মানু হাবি তিলয়া ইমা দুর্গার জয় ধ্বনি দিয়া সেন্দাত বিসর্জন দিলা। এবাকা ট্রাকে নিতারাগা। ঐ পূজা উহানেই শিলঙে আমার একতাহান বার জাতর পরিচয়হান দিল। গিরক নিয়াম অতিথি পরায়ণ যেসাদউ আকপাক

জিতাইগা। তার গরে অনেক মানু আশ্রয় নিয়া চাকুরীউ পাসিলা। গিরকরে শিলংর মানু নিয়াম পাৰা শ্ৰদ্ধা করলা। ৮০ গজে বয়স অয়া ২০০৮ সনে দৌর খয়া পেইলগা। ওঁ গিরকর আত্মার শান্তির কামনা করিয়ার।

মুরুলী গিরকর দেহাদেহি অয়া কালাঠাকুর গিরক সিলটেত্ব আয়া ফরসেগা। মুরুলী গিরকর মুঙামুঙি ইলেকট্রিক লনড্রীর দোকান আগ দিয়া পালয়া থাইল। গিরকর গরে ফাণ্ডেলে কাদা বারাত মানু আসি উতাই পারিল নারিল খেচুরি পালি দিয়া খানি আহান তৃপ্তি পেইলাং। কিটিং রোডর খাসিয়া, নেপালী, মারোবারী, বিহারীয়ে হারপেইলা যে এপেইত মণিপুরী আকতা আসি।

প্রতাপগড় কচুবাড়ীর অম্বিনী সিংহ গিরক পুলিশ বাজারে ‘সিংহ টেইলর’ দোকান আগ দিয়া শিলঙে মণিপুরী টেইলারগ বুলিয়া পালয়া আসিল। গিরকর দোকান উগ সময় উহানাত বিষ্ণুপ্রিয়া মণিপুরীর ঘাঠিগ অসিল। অফিস ছুটি অইলেই আমার মানু হাবি তিলয়া তার দোকানে য়ারি পরি দিয়া দুঃখ দুর্দশা থাইলেউ উতা পাছরিয়া সময় কাটেয়া গরে ফিরলাং।

পুলিশ বাজারহানর হম্বুকে থানাই এরে সুযোগ এহান পেইলাং। এমনউ অসিল সিংহ নাং থাইলে পোষ্টমেন উগই রাই সাঙয়া চিঠি পত্ৰ উপেইত থদিয়া গেলগা। গিরকে দোকান উগ দেনাই তারতাউ হবা অইল আমারতাউ হবা অইল এহান আমার সৌভাগ্যহান। গিরক দৌ অইল।

পইলাকার শারীত চাকুরী জীবি ‘হরিপদ সিংহ’ (খালপার), রামপ্রসাদ সিংহ (হিজারী), ক্ষিরোদ সিংহ (পাথারকান্দি), সাধু (যোগেন্দ্ৰ সিংহ) (মাচুঘাট) পটল রাজকুমার (চন্দ্রমোহন, রাজনগর), বীরেন সিংহ (রাজনগর), ডাঃ হরিপ্রসাদ সিংহ (বারমুনি), উদয় সিংহ (দলিবিলা), বেণিমাধব সিংহ (সিংলা), সুধীর রাজকুমার (পাথারকান্দি) আরাকউ গিরিগিথানী আহেসিলা।

নীলমাধব মুখার্জী (লোৱারপুৰা) মণিপুরী নৃত্য-কলা বিদ্যাহানল ওঁ সময়ত শিলঙে ফরসেগা। গিরক মণিপুরী নাসাল শিলং শহরে নাঙ পালসিল। গিরকর বিস্বস্ত্য পরুৱা বিজয় সেনা রাজকুমার লগে থায়া কীৰ্ত্তনে ডাক বাৱেয়া শিলঙে আমার কলা-কৃষ্টিহানউ পালকরেসিলা। উদয় গিরকউ শিষ্যত্ব গ্রহণ করিয়া হাদি হাদিত ডাক বাৱাসিল। নীলমাধব এইগা গিরক নিয়াম দিন নাথায়া বিদেশে গেলগা।

১৯৫০ সনর হম্বুকে শ্রীপ্ৰেমানন্দ সিংহ গিরকর সভাপতিত্বেই ওঁ সময় মণিপুরী এশোসিয়েসন আগ কুনো রকম হঙকরিয়া অকরাগ দেসি। পিসে

প্রেমানন্দ সিংহ গিরকে পটল রাজকুমার (চন্দ্রমোহন) গিরকরাঙ সিলকরে দেসে। পটল গিরকর বলিষ্ট পদখেপে সংঘগ চাঞ্চল অইতে থাইল।

পিসে পিসে আরাকৌ গিরিগিথানী আয়া শিলং শহরগ আমার মানুরে বুজিল বরা অসিগা।

এপেইত প্রমিলা রাজ্যর য়ারি আকচুটি দেনা অইল।

মহাভারতে প্রমিলা রাজ্যর উল্লেখ আসে আজির জয়ন্তিয়া রাজ্য এহানেই প্রমিলা রাজ্যহান অসে (খানি আহান বাংলাদেশে হমাসে) রাণী প্রমিলা রূপে গুণে বীরত্বে তুলনা নেয়সিলি, রাণীগ অয়া রাজ্যহান পালিয়া আসিলি। পঞ্চপাণ্ডবর যজ্ঞর গরাগ প্রমিলাই দরিয়া থসিলি, মহাবীর অর্জুন প্রমিলার বীরত্ব উহান মানিয়া নিলগা। যজ্ঞর দিনে হস্তিনাপুরে যানার নিমন্ত্রণ করিয়া গেলগা।

পরমপরাগত নিয়ম অনুযায়ী আজিউ মেঘালয় রাজ্য নিঙলপীর অধিকার প্রবল অয়া আসে। নিঙলপীর মোহময়ী মায়া জালে হমেইলেগা আর ফিরিয়া নাইতারা এহান রূপ কথার য়ারিহান নাগই, হুতুমকার য়ারিহান। বাহিরর মুনি পেইলে উগরে হেয়কগ বরণ করিয়া হারৌ অইতারা, জিপুত উতাই মালকর উপাধি নিতারাগা। মহাভারতর যুগেত্ব চলিয়া আহেসে ঔ প্রথা উহান আজি পেয়া দরিয়া থসি। তানুরাং জাতর বেদাবেদ নেই, বিয়ার পরে দামানউগ কন্যাগর গরে গর দামানে থার, বিষয় সম্পতি নিঙলপির আতে হাবিতা থার। তানুর আরাধ্য দেবী জন্তেশ্বরীর পূজা এবাকাউ করতারা অবশ্য আজি কালি নিয়ামপারা সংখ্যা খৃষ্টান ধর্ম গ্রহণ করেসি।

জয়ন্তীয়ার মানু মহাভারতর যুগেত্ব আৰ্য-সংস্কৃতি গ্রহণ করিয়া আৰ্য্য-হিন্দু ভাবাপন্ন অয়া আসিলা। যাবতীয় উৎসব, নাসা, রথযাত্রা করতারা, মরলে মরাগ দাহ করতারা। এবাকাউ শিলঙর লাইমুখার কাদাত গুরা লাইনে ঝর্ণা হানর পারগত জয়ন্তীয়া শ্মশান ঘাট আহান আসে। ১৮৩৫ সনে বৃটিশে আক্রমণ করানির পরে খৃষ্টান ধর্ম নেনা সত্বেউ পূর্বপুরুষর পরমপরা উহান নিঙলপি উতাই চেতক দরিয়া থসি।

পরম বিষ্ণু ভক্ত বিষ্ণুপ্রিয়া মণিপুরী জাত এহান ধর্মহান এরাডেনা নিয়াম হিনপেইতারাতা থকয়া মাত্র মুষ্টিমেয় কতগ ছাড়া ঔ মায়াজালে বেরা নারেসে। শিলঙ শহর এগ ১৮৭০ সনর গরে বৃটিশে পত্নন করেসি। মনোরম প্রাকৃতিক দৃশ্য চেয়া পেট নাবুজের, শিলঙেস্ত হিমালয়র বরফর চুড়াউতা চেইতে আহি চক্চকার আবহাৱা নিয়ামপারা ঠুম, বারমাস ঠাণ্ডা, সাস্থকর স্থান বুলিয়া প্রসিদ্ধ অসে। শহরর হম্বুকে ডাঙর হুদ আগ আসে। শহরগর বারাদে

পানির জেজেরী (জলপ্রপাত) কতগ আসে। বিডন, বিশপ, এলিফেন্ট এতাহারা চেরাপুঞ্জীতে পৃথিবীর বিতরে হাবিও নিয়ামপারা বরণ দেৱ। ঔহানরকা রাজ্যহানর নাং মেঘালয় বুলিয়া থসি।

১৯৫০ সনর হম্বুকে মণিপুরী এশোসিয়েশন আগ হংকরেসি। এহান শিলঙে বিষুওপ্ৰিয়া মণিপুরীৰ পইলাকার কাকেইহান। তাপক তাপক সাধু ঠাকুরর জন্মতিথি পালন করানি অকরেসি।

১৯৬১ সনে আসামে ভাষা আন্দোলন চিৰইলগা, বরাক উপত্যকাত শিলচর রেল ষ্টেশনে এগারগ পুলিশর গুলিত শ্বহিদ অইলা। আসাম সরকার বাধ্য অয়া বরাকে বাংলা ভাষা ব্রহ্মপুত্রে অসমীয়া ভাষা বহাল থাইল। মুখ্যমন্ত্রী বিমলা প্রসাদ চালিহা গিরক আসিল।

ঔ জ্বি উগ নিবতে নিবতে বরাক উপত্যকাত বিষুওপ্ৰিয়া মণিপুরীৰ মহাসভাত্ব ভাষাহানর দাবি আহান উঠিল। বৈরাকহানর ডেউ উগ রাজধানী শিলং শহরে ফৰইলগা।

সমাজসেবী, সাহিত্যিক, গবেষক, মহেন্দ্ৰ সিংহ গিরকর বংস জাত পুতক লক্ষ্মীকান্ত সিংহ (কুতুল) গিরকর গাড়ীগত বরাকর ডেউগ লাগিলগা। মণিপুরী এশোসিয়েসন উগ বিষুওপ্ৰিয়া মণিপুরী এশোসিয়েসন নাঙ দেনাৰ ঠৌরাঙে নিয়াম পাৱা হন্না করল। রাজনৈতিক কারণে তার আশা পুঙনিং থুমকরে নারল। এহানর সাজা ২০০২ সনে পানা অইল—

গিরক ডিল নাকরিয়া ইমা ঠারল ‘চীন এগ কুনগ’ মুখপত্ৰ লেরিক আহান নিকাল দিল। এরে লেরিক এহান শিলঙে বিষুওপ্ৰিয়া মণিপুরীৰ পইলাকার লেংকরা লেরিকহান। গিরক শিলঙে আমার ইমাঠারর জন্মদাতাগ। ‘পাঞ্চজন্য আৰ্জুনী’ বুলিয়া আৱাক পত্ৰিকা আহান প্রকাশ করল। নাজিৱেয়া ইমাঠারর লেরিক লেংকরিয়া সমাজর সেবাত ব্ৰতি অসিল। গিরক কতিউ সমাজ ধরদী অসিল বিষুওপ্ৰিয়া মণিপুরী জাতহান চাংখল করানির নিঙে যেবাকা আমার সমাজে মাদইগাঙর লগে খেইনা খেপক অয়া আসিল। সমাজ সেবী লক্ষ্মীকান্ত (কুতুল) গিরকর একান্ত চেষ্টায় পাথারকান্দি তথা সমাজর শীৰ্ষস্থানীয় মহেন্দ্ৰ গিরকর পরিবারর সম্পূর্ণ য়াথাং নিয়া ১৯৬৪ সনে আপাৱ শিলঙেত্ব নাঙ করা মাদই পরিবার যতীন গিরকর খুল্লি বনকর লগে বিধিমতে লুহং করিয়া রাজারগাঙ মাদইগাঙর মহা মিলনর পথগ সেংকরে দিয়া সমাজর ডাঙর উপকার আহান করে দিল। শিলং বাসীয়ে হাবি ঔ লুহং উহানাতে যোগদান করিয়া হাৱউপাৱ মেল ফুৱেইলাং। এহান গিরকর ডাঙর স্মৃতি

আহান। চাকরীর জীবনের বিতরে গৌহাটীত বদলী অয়া আহিল। খৃষ্টানবস্তীত গর দুৱাৰ হংকরিয়া ব্যস্ততাৰ ভিতৰে থায়াউ সেংক, নাটক, গল্প, উপন্যাস, লেংকৰাত থাইল। গিরকে সমাজসেৱা কৰিয়া বংশৰ মৰজাদাহান থইল। খৃষ্টানবস্তিতে দৌৰ খয়া পেইলগা, তাৰ সমাজ প্ৰেমৰ তুলনা নেই।

১৯৬৪ সনে কেপ্তেইন উইলিয়াম সাংমাৰ লগে নিকলসৰায় নেতৃত্বে আসামেত্ৰ খেয়নিৰ আন্দোলন আহান অকরাগ দিলা।

আমাৰতাউ বয়া নাথাকি। আমাৰ মূৰষী গিৰিগিথানীৰ চেষ্টাই ১৯৬৪ সনে সাধু ঠাকুৰৰ জন্মতিথি এহান সরকারৰাং বিশেষ চুটি আহান আদায় কৰানি অইল। Special Casual leave for followers only কেন্দ্ৰীয় তথা আসাম সরকার সংস্থা হাবি ঔ দিনে ছুটি পেইলাং। শিলঙে ঔ দিনে আমাৰ নিজস্ব মন্দিৰ নেয়সিল। বাদ্য অয়া ধান খেতিৰ নামঘৰে ব্যবস্থা কৰানি অইল।

গজে হেপিভেলী আৰ্মিকেম্প, তলে উম্পিলিং অৱ বি.এস. এফ. কেম্পৰ জোয়ান ধান খেতিত ফৰইলাগা। ঔ দিনৰ দৃশ্য উহান নাদেহেসি উতাৰে ইকরিয়া বুজানিৰ ভাষাহান বিসাৰেয়া নাপাউরি। ঔ দিনে শিলঙে বিষ্ণুপ্ৰিয়া মণিপুৰী হাৰৌৰ জুয়াৰ উহান শিলংহান খলপিখলক কৰেসিল। ঔ দিন উহান বিষ্ণুপ্ৰিয়া মণিপুৰীৰ ইতিহাসে লিংখাত থাইল।

১৯৬৫ সনে পাকিস্তান ভাৰতৰে আক্ৰমণ কৰানিৰ সিজিল কৰেৰ সুৰাক উহান হাৰপেয়া ঔ সময়ৰ ভাৰতৰ প্ৰধানমন্ত্ৰী লালবাহাদুৰ শাস্ত্ৰী গিরকউ প্ৰশ্ন্যুত্বৰ দেনাৰ নিঙে ডাঙৰ পদক্ষেপ আহান নিলগা। শিলঙেত্ৰ সিদাসিদি দিল্লীত আমাৰ গ্ৰুপ আহান (সশস্ত্ৰ সীমা বল), উৱাদ্বাৰা যানার আদেশ দিলা। মিয়ৌ ঔ গ্ৰুপ উহানৰ বিতৰে আসিলু। নৃত্তাচাৰ্য্য গুৰু চন্দ্ৰকান্ত সিংহ গিরক দিল্লীত নাসা বাগাদিয়া আসে, ৰাজদানী দিল্লী সাগৰগ অসে। মণিপুৰী নৃত্য-কলাৰ পূজাৰীগ থকয়া গিরকৰে নিকালতে অমাটিক হিননাপাসু। দিল্লীৰ নাঙ কৰা বাঙালী কলনী উগত নিঙল সৌ কতগ নাসা বাগাদেৰ খৰৰ এহান বাঙালী ইতাউ আগৰাংত পেইলু। যুদ্ধৰ ঢোলগ ৰহানিয়ে গিরকৰ লগে দেহাকৰে নারলু। আমাৰ গ্ৰুপ এহান দিল্লীতেই থাইলাং প্ৰধান সেনাপতি জয়ন্ত নাথ চৌধুৰীৰ ৰণ কৌশল লালবাহাদুৰ শাস্ত্ৰীৰ বাহাদুৰী পদক্ষেপ যুদ্ধৰ জয়ৰ মালাডাল 'জয় জোয়ান- জয় কিষাণ' জোৱানৰ গাৰে পিদা দিল। দিল্লী তথা ভাৰতবৰ্ষ হাৰৌৰ জোয়াৰহান কাইল।

ঔ হাৰৌৰ দিন আহানাত হেৰ কৰিয়া বাঙালী কলনীত গিরকৰ লগে দেহা কৰলু। মি গিরকৰ পক্ষে কনাকসৌগ, কিন্তু মৰ যাৰি পৰিৰ চৌৱাং

দেহিয়া হারৌরে তার গরে যেসাদেউ যানার হেইচা আহান করল। যুদ্ধহান থামিল কিন্তু গিরকরতা জীবন হানেই যুদ্ধহান। মিকুপ আহান সময় নাপার, মিউ সেংক দেহা করানির সুযোগ নাপেইলু। গিরকরে দিল্লীর ডাঙর ডাঙর ব্যবসায়ী, মন্ত্রীয়ে চিনেসি। সময়ে না বাসার ১৯৬৫ সন লমইল, ১৯৬৬ সন হমেইতে হমেইতে মরে উত্তর-পূর্বাঞ্চল পশ্চিমবঙ্গ সহ সশস্ত্র সীমা বল ট্রেইনিং সেন্টার হাফলঙে দিলা। গরর কাদাত থকয়া হারৌরে তেজ্জাম আইলু। হাফলঙর অধ্যায় তঙাল করে দিলু। য়ারি আহান ছনলু।—

১৯৬৫ সনে শিলঙে সাধুঠাকুরর জন্মতিথি এহান চাংখল করিয়া পালন করানির ঠৌরাং করতে গিয়া সমাজসেবী সাধুঠাকুরর পরম ভক্ত হরিপদ সিংহ গিরক বানথা অয়া পরিল। ঔগদে পরলোকে গেলগা। শিলঙে আমার মানু দুঃখর সাগরে পরলা। গিরকে সাধুঠাকুরর প্রতি ভক্তিভাব এহান আমার হৃদিগত ফৌকরে দিল। গিরক আমার অন্তরে চিরদিন বিরাজমান অয়া থাইল। গিরকরে পাছরানি নারতাঙাই।

সাধুঠাকুরর জন্মতিথির উৎসব এহানর প্রেরণার মন্দির হঙনির আশা আহান শিলংবাসীরাং জাগিল। ১৯৭২ সনে তদানিন্তন খাসি জয়ন্তীয়া পাহার জিলা গারো পাহার জিলা মেঘালয় রাজ্য নাঙ দিয়া আসামেত্ব খেয়ইল। আমার মুরুষী চাকরীজীবী প্রায় আসামে আইলা, উতার বিতরে যে যে গিরিগিথানি আসিলা উতার আপ্রাণ চেষ্টায় গভর্ণর হাউছর কাদাত গোবিন্দ মন্দির এগ সম্পূর্ণ হংকরলা। মাত্র দুগ-তিনগ পুরানা মানু থাইলা, বাকি নুৱা নুৱা গিরিগিথানী আয়া মন্দিরগ আরাকৌ উন্নতি করে দিলা। পিসে পিসে দুগ-তিনগ পুরানা মানু উতার লৌনামে কাদাবারার বেইবুনির আতে মন্দিরগ কাৎকরানির ব্যবস্থা করেসিলা। গোবিন্দর কৃপায় আছিল গিরিগিথানিয়ে পাঙকাল থেৎকরিয়া আমার মন্দিরগ আমার আতে থনা পারলা, এহান ডাঙর ঘটনা আহান। আজির শিলঙর মন্দির কমিটিরে শতকুটি হমা কাতকরুরি। এহানাং আমার সংস্কৃতি চিহ্ন ফিরালহানর য়ারি আকচুটি ইকরলু—

১৯৯০ সন দীর্ঘ ২৫ বসর পরে সেংক শিলঙে বদলি আইলু। শিলং শহরে বিদেশী খেদা আন্দোলনহান চলতে আসে। ঘন ঘন ঘরবন্দি (কারফিউ) আইন বলবৎ অর। এতার গজে দুর্গা পূজাহান আইলেতে আন্দোলনকারী মারাং কাইতারা। এমনকি দশমীর দিনেউ বিসর্জন দেনা নারতারা। দিন জারগা, চেইতে চেইতে হরি উত্থান আহিল, মিয়ৌ হারৌ বৌ নাপেয়া হবাকরে ফুল্ল হাজেয়া ডিগল বাহাগত ফিরালহান কুপলু। পিসেদে হারপেইলু, উম্পীলিং এ আমার মানুরে ফিরাল নাকুপেসি।

উম্পীলিং বাঙালী কলোনীগ, ঘরর গিরিগৌ বাঙালীগ। চারিয়বারাদে খাসিয়াই বেরিদেসি। মর ডিগল ফিরাল উহান দেহিয়া আটিয়া যিতারাগা, মানু উতাই উল্টে উল্টে চেইতারা। কাদা বারার বাঙালী উতাই আংকরলে মাতুরি— মণিপুরী জাতীর সংস্কৃতি চিহ্নহান। এহান মাতিয়া হাতেক করে থেয়ইয়া জাউরিগা। বুজন বাঙালী গিরক আগই মাতেসিল— সিলেটর দেওয়ান ভাগে বিষুপ্ৰিয়া মণিপুরীর গাঙ উহানাত এসাদে ফিরাল দেহেসু। হঠাৎকরে আরাক জবরদস্ত কারফিউ আহান দিলা। উম্পীলিং এ দেখলেই গুলির হুকুমজারী অইল। কারণ— বাঙালী কলোনী উগত কাদা বারার খাসিয়া উতাই রাতি উৎপাত করতারা।

পরর দিনে বিয়ানে মোর ফিরাল উহান দেহিয়া পেইরাক করে সিপাই চারিগই ইরেলগ অয়া হমেয়া আংকরতারা? যুমগি কাদাই “ঘর কুরাং” ‘বিষুপ্ৰিয়া মণিপুরী গিনিনে,’ বিষুপ্ৰিয়া মণিপুরী। গর পাথারকান্দি বুলিয়া মাতলু ঔ হের উগত ঘরর গিরিগ বার কাদার বাঙালী উতাই মনেইলা আজি সিংহ বাবুরে দরিয়া নিতাইগা এতা-এতা, য্যারী দিতারা। মরাং কারফিউ পাসহান আসেতা থকয়া অফিসর কামে আসা যাওয়া করুরী হানতে তানু মনেইলা এগ ফাসে পরিল।

সিপাহী উতার ভিতরে শিলচর বন তারাপুরর থাই বেয়ক আগ আছে। মোরে আশ্বাস দিয়া নমস্কার করিয়া গেলগা। ঔ দিনেত্ব দিনে রাতিয়ে পাহারা দিয়া থাইলা। বাঙালী উতা হারৌ অয়া নিংশাহান বেললা।

এখুরুম মালিক গৃহিনী উগই নিক্কা নিক্কা সেনদাত ফিরাল হানর গুরিউগত নিংকরিয়া দুপ থমেই দেনা অকরল। কোন আগদে যিতেগা ফিরাল হান হমা দিয়া জিরিগা। মোর অফিসগ লাই মুখরাত থানায় বেলেয়া গেলুগা, আর যানাউ নারলু খবরউ করে নারলু। ঔ দুদিনে ফিরাল এহান থানাই কাদাউগ ‘ভগবান স্বরূপ’ প্রহরীগ অয়া আসিল। নিংশিঙে থনার কথা—

এবাকা, আর্মি, সি. আর. পি., বি.এস.এফ, নেপকো, আর আর প্রাইভেট কোম্পানীত কাম কাজ করিয়া আসি। এ অবস্থায় আজির যুগে শিলংবাসীয়ে ঔ মন্দির উগ উন্নতি করিয়া যত্ন সহকারে থসি এহানর কা তানুরে শ্রদ্ধা ভক্তি দেওরি।

হুদা শিলং বুলিয়া নাগই। উত্তর পূর্বাঞ্চলর ডাঙর হরকাং শহরে যেপেইত যেপেইত আমার মানু পুলসিগা উপেইত মন্দির হংকরিয়া আমার নিজর ধর্ম-ভাষা, সংস্কৃতি জিৎতা করিয়া আসি উতারে মি সাজারাঙে হমা কাতবরুরি।

শিলচর, করিমগঞ্জ, হাইলাকান্দি, হাফলং, ডিফু, ছরকাং শহর মাইবং, তিনিচুকীয়াত আমার মন্দির হঙসে। এমনকি কোহিমাতেউ চেষ্টা করতারা এহান আমার সমাজর উন্নতির পরিচয়হান।

লউটাক গৌহাটীত মালিগাঁও, বামুণীমৈদান, খৃষ্টানবস্তী, খানাপারা, দক্ষিণগাঁও, বরবাড়ী, পাঞ্জাবারী, সুর্দশনপুরে মন্দির হঙয়া লমসে। কলিতাকুছি, হেঙেরাবারী, নুনমাটীত চেষ্টা নিতারাগা। আজির যুবক-যুবতী চেতনা জ্ঞান পেয়া গণতন্ত্রলগে তাল মিলেয়া দ্রুত গতিতে উন্নতির পথে কাকেই কারতে আসি।

আমার প্রজন্মই গেলগা য়ারি পরি হারপানির নিঙে 'ঔ দিনর নিংশিং'এ খানিমানি আহান এগদে উগদে অইতে পারে উতারকা ক্ষমা চাউরি। এহানাত আজির শিলঙর মন্দির কমিটির সভাপতি/সাধারণ সম্পাদক বার কার্যবাহী সদস্য গিরিগিথানীর প্রতি মর বিনম্র অনুরোধ থাইল। ১৯৭০ সনর গরেন্ত্র আজিপেয়া যে যে গিরিগিথানি পদফামে পালয়া আসিলা তানুর নাঙ উতা ধারাবাহিক করে ইকরিয়া সম্পাদক গিরকরাঙ ফৌকরে দিলে উপকৃত অইতাঙাই, থাংনাকার সংখ্যাত লিংখাত করানি অইতই। শ্রদ্ধাভক্তি দিয়া লমকরলু। লৌটাক গুৱাহাটীত বিষ্ণুপ্রিয়া মণিপুরী মন্দির হঙছে উতার চিত্রগ দেনা অইল।

হাফলঙৰ পইলাকাৰ অধ্যায়

আসামৰ পাৰ্বত্য জিলা উত্তৰ কাছাড়ৰ সদৰ শহৰ হাফলং। প্ৰাকৃতিক অবস্থাবেদে থাংনাকার শিলং বুলিয়া নাং পাসে। মনোরম আবহাওয়া, সাস্থ্যকর স্থান, বড়াইল টেঙাৰাগৰ চুড়া আকেইগ হাকহানাত থেঙসেগা। হাব্বিৰগজৰ চুড়াগ মহাদেও টিল্লা ৫৭০৬ ফুট। হাফলং শহৰগ প্ৰায় ৩৫০০ ফুট গজে শহৰগ ঠিক বরাইল পাহাড়গৰ পেঠগত হঙয়া আসে। পৰিস্কাৰ পৰিচ্ছন্নতাই লিকলিৰ দৌগ পাৰা। হম্বুকে প্ৰকৃতি ইমাই হংকৰেদেদে হুদ আগ বারমাস পাণি বুজিয়া থাৰ। নিঙলপির ফিজেত প্ৰায় আমাৰ লগে তিলসে। আগে রাজ্য উহানৰ নাঙ হিড়িম্বেশ্বৰ আসিল।

এপেইত হিড়িম্বে রাজ্যৰ য়াৰি আকচুটি আহিল। মহাভাৰতে হিড়িম্বে রাজ্যৰ উল্লেখ আসে—

যতুগৃহ দাহৰ পৰে পঞ্চপাণ্ডব সূৰঙৰ পথেদে নিকুলিয়া বনে জঙ্গলে বুলতে বুলতে আকদিন হিড়িম্বে রাজ্যে ফৰসিগা। ঔ রাজ্য উহানৰে হিড়িম্বেশ্বৰ বুলিয়া মাতেসি। এবাকার বড়ো-কাছাড়ি, ডিমাसा কাছাড়ি, কাৰ্বি কাছাড়ি অঞ্চল জুড়িয়া আসিল। ঔ রাজ্যে তানুৰ আৰাধ্য দেবী কালী পূজাত নৰবলী প্ৰথা আসিল এমনকি মানু খাসি বুলিয়া রাক্ষস উপাধি পাসি। এ রাক্ষস এতা লঙ্কাৰ রাবণৰ রাক্ষস জাতি নাগৈ।

সভাবতঃ মানুৰ গতহান পেয়া হিড়িম্বেৰ খুল্লি বনক হিড়িম্বেৰে দিয়া পেঠেইল। হিড়িম্বে নিঙলগ থকয়া ভীমৰে বানা নুংশি পেয়া য়াৰি পৰি দিতে ডিলইলহান দেহিয়া হিড়িম্বে তালকরিয়া আহিল, ভীমে হিড়িম্বেৰে কুঠাঘাত করিয়া মারল। উপায়ন্তৰ নাপেয়া ভীমে মালক কুন্তীৰ আদেশ নিয়া হিড়িম্বেৰে লুহং করিয়া থাইল। ঘটৎকচ্ জৰম অনায় ভীম সেংক বেইবুনিৰ লগে তিলইলগা। মালক পুতক হারৌৰে রাজত্ব করিয়া থাইলা। হিড়িম্বেয় নিক্কা নিক্কা মানু আকেইগ বলী দিয়া কালী পূজা করিৰি।

পাশা খেলায় হাৰিয়া পঞ্চ পাণ্ডব বনবাসে গেলাগা। আকদিন হিড়িম্বে রাজ্যে হাৰনাপেয়া ফৰইলাগা। পুতক ঘটোৎকচ বলী দেনাৰকা বিসারতে বিসারতে বাপক ভীমৰে নাচিনিয়া দরিয়া নিলগা। মালক হিড়িম্বেৰ হেয়ক ভীমৰে চিনিয়া জাংহানাত হমা দিয়া পৰলি।

কুরুক্ষেত্রের যুদ্ধে ঘটকচ সুদূর ভারতের মুণ্ডর দেশেই গিয়া পঞ্চপাণ্ডবের পক্ষ অগ্নি যুদ্ধ করেছিল। কর্ণর আত্মে মরিল।

বড়ো কাছাড়ি, ডিমাসা কাছাড়ি ভীমর বংশ বুলিয়া দাবি করতারা। হিড়িম্বার নাঙে হিড়িম্বাপুর বুলেসি। হিড়িম্বাপুরেই আয়তে আয়তে ডিম্বাপুর এবাকা ডিম্বাপুর অইল। পরমপরাগত কাছাড়ি রাজার আরদ্য দেবী কালীর মুণ্ডে নরবলির প্রথা চলিয়া আছে। ঔহানর নিদর্শন এবাকাউ শেষ রাজধানী খাসপুরে শিলচর শহরেই ১২ কিঃমিঃ উত্তর পূর্বে আসে।

অদ্য উদারবন্দে কাচাখাস্তি বা কাচাকাস্তি (ছনার রং) জাগ্রত মন্দির আসে। নরবলি বৃটিশে বন্দ করেদেসি। ঔ রাজ্যের সদর শহর হাফলং বৃটিশে বহাদেসি।

টেঙারার পটে পটে রেল সড়কগ হংকরিয়া হাদি হাদিত সুরঙ কাপিয়া, পাতাল ফরকরিয়া পুলবাদিয়া জাটিঙা হানর পারে পারে ইলয়া বৈরাকহানর ডাঙর রেল পুল উহান লালয়া বরাক উপত্যকার লগে যুগাযুগ অসে। বদরপুরেই লামডিঙ পেয়া বৃটিশে হংকরেসি রেল সড়ক এগ উত্তর পূর্বাঞ্চলে পাহাড় লাইনগ বুলিয়া খ্যাত অসে। রেল সড়ক এগ ১৯০৮ সন পেয়া হংকরেসি। টেঙারাগ কানা লামানি নারতা থকয়া দুগ রেল ইঞ্জিন লাগেইতারা, আগ মুণ্ডে আরাক আগ পিঠিয়েদে। মাছরেই লাকনেই তলে দাউতুহাজা রেল স্টেশনগ দেহা পেয়ার। হাফলং শহরগর তলে দুগ রেল স্টেশন আসে। আগ হাফলং হিল আরাক আগ লরার হাফলং, দ্বি় স্টেশনর লগে যোগাযোগ অসে। তবে লরার হাফলং স্টেশনগই গুরুত্বহান নিয়াম। হাফলং শহরগর খানিপপারা দুরেইত জাটিঙা টেঙারাগত আচানক পাইহিয়া আকতা জুন মাহাত আইতারা। রাতি জিরলুকা, পহর-মিঙাল দেখলে উলুপকর সাদে জাপদিয়া পরতারাগা। দেশ বিদেশত পাইহিয়া বিশেষজ্ঞ আয়া গবেষণা করতারা। ফলর রাজ্যহান অসে— কমলা মদুর, কেহেম, কলা, মজা খবল ডেরি ডেরি রেল স্টেশনে নিকালতারা। টেঙারার মানু একমাত্র জুম খেতিল জিংতা অয়া আসি। কুমারা, খলতুম, বেইনং, মকছি, জুরিবাত, আদা-আন্দি, তিল, কচু এতা নিয়ামপারা ফলের। বরাক উপত্যকার কাদাং আসেতা থকয়া কাদাবারার বিহারা হিলারা চন্দ্রনাতপুর কালানির আমার মানু নিয়ামপারা হাফলংর ছরকাং শহর উগত পুলসিগা।

আমারতা যেপেইত যিতারাগা উপেইত নিজরধর্ম কলা-সংস্কৃতি জিংতা করিয়া যুগ যুগ দরিয়া আসি, হাফলঙর ক্ষেত্রেই ব্যতিক্রম নাসে। নিয়াম দিনকার য়ারিহান নাগে—

১৯৬৬ সনে মি কর্মজীবন নিয়া হাফলং ফরইলুগা। বরাইল টেঙাৰাগ যেসাদে গুনজিয়া আসে ঠিক উসাদে হাফলংর মানুর লগে আমার মানু নুঙেইপার ঘুমে ঘুমজিয়া আসি। এমনকি ছাত্র ছাত্রীৰ অভাবে মাত্র রাতিকার কলেজ আগ আসে। যাহাতে চাকুরী জীবীউ তামকরানি পারতাই। ঔ কলেজ উগত পয়লাত্বউ আমার অজ্ঞাণুরু নামদেব সিংহ (বারমুণি) ইতিহাস বিষয়র প্রফেসারগ অয়া নাং পালয়া আসিল। গিরকর য়ারি আহান জনলু— ঔ সময় আই. পি. এস. পাশ করিয়া বহেসে, মনোরম আবাওয়া, সাস্থ্যকর, শান্তিপ্রিয় শহর উগর মায়াজালে হমেয়া আই. পি. এস. পদে যোগদান নাকরেসে অবশ্য তদানিত্যান উত্তর কাছাড় তথা কলেজর সেক্রেটারী নিত্যানন্দ দাওলাওপুৰ অনুরোধ মরমে থাপরসেগা। ঔ শান্তিপূর্ণ শহরউগ এবাকা জ্বির লুকা লাগের।

আর ঘুমে থানা নারলাং সমাজপ্রেমী গাৰরাপেয় হজাক অয়া হাতে হাতে কাকেই কারানি অকরলাং, গাৰরাপেইর মারেঙে — চন্দ্রহাস (বারমুনি), লক্ষ্মীন্দ্র সিংহ (বিহারা), কনাক মহেন্দ্র সিংহ (বাগরাজন), রামানন্দ সিংহ (বিহারা), নিশিকান্ত সিংহ (লংঘর), মণিলাল রাজকুমার (দুধপুৰ) লগে মি (লুবারপুৰা)।

পয়লাকার শারীর সমাজসেবী বুজন গিরিগিথানীর নাং অমরেন্দ্র রাজকুমার (রাজনগর), কুবের সিংহ (মাচুঘাট), মুকুন্দ সিংহ (বারমুণি), ভলদেব সিংহ (বারমুণি), রামকৃষ্ণ সিংহ (পাথারকান্দি), নামদেব সিংহ (বারমুণি), বংশি সিংহ (দুরপাতিল), সুবুধ সিংহ (শিবরাজন), রিশিৰাজ সিংহ (গরবন)। নিঙলপির বিতরে— শ্রীমতি ফুলরাণী সিংহ (মাচুঘাট), শ্রীমতি ভানুমতি সিংহ (রাজনগর), বাবুলোক সিন্হা।

১৯৬৭ সনে গাৰরাপেই হাবি আকতা অয়া বুজন গিরিগিথানীর পরামর্শ নিয়া ঘরে ঘরে খেচুরি পালি দেনা অকরলাং।

আমারতা মন্দির মালঠেপ নেই বার ডাঙর উঠানউ নেই। হাফলং বাজার হানাত বাঙালী সমাজর জগন্নাথ প্রভুর মন্দির আগ আসে। ঔ মন্দির উগর মহন্তগ উরিষ্যার বয়স্ক পাণ্ডাগ। জগন্নাথর মন্দির উগত খেচুরি পালি দিতে থাইলাং।

এহানাত বুজন গিরক আগর এলাহান না ইকরিয়া নারলু। এলাহান আতর তালি।

উড়িষ্যে জগন্নাথ পুরীমে।

ভল্লবি রাজ্যে এ.....এ.....এ।

উড়িয়া মাংগে খেচুরি

বাঙালী মাংগে ভাত

সাধু মাংগে মহাপ্রভুর মহা পরিষাদ।

এরে এলাহান ছনিয়া বার নাসার টেংঠা ভংগী দেহিয়া পাণ্ডা গিরক উগই মাতেসিল...? “বিষুগপ্রিয়া মণিপুরী এতা জগন্নাথ প্রভুর আসল পরম ভক্ত” বুলিয়া নিয়ামপারা বাখান করেসিল। এলা এহান দেসিল গিরকর নাঙ কুবের সিংহ (মাচুঘাট)। মন্দিরগর লগে বিটা ঘর আসে।

খেচুরি পালী, কাপকর পালী করতে গিয়া হাবির মনে মন্দির আগ বার সাধুঠাকুরর জন্ম তিথি এহান পালন করানির ঠৌরাং আহান উদয় অইল। দিনে বাসেয়া নাথার ১৯৬৯ সন তেললাম আহিল। সাধু ঠাকুরর কৃপাদৃষ্টি নিয়া জন্ম তিথিহান লাঙকরলাঙ। আমারতা কুরাংকার রূপা পয়সা, সংখ্যায়উ নগন্য। হাফলংর স্থানীর বাসিন্দা কাছাড়ী, বাঙালীরাংত বিশেষ করে পাণ্ডা গিরকর চেষ্টাই নিয়ামপারা ধনসাম্পাল জোগার অইল।

নাম সংকীৰ্তনহানর ব্যবস্থা করলাং এহানর প্রধান উদ্যোগতাগ চেংকুরীর লালমোহন গিরক এবাকা বয়সে দৌর খয়া পেইলগা। ডাকুলার মাৰেঙে মৃদঙ্গচার্য্য গুরু নীলমাধব মুখার্জী (গৌহাটী), গুরু গিরিচান্দ সিংহ (গরবন)। ইসালপার মাৰেঙে — এলা শিরোমণি অজা কালাসেনা রাজকুমার (পাথারকান্দি), কুকিল কণ্ঠি অজা নীল সিংহ (বিহারা) ভাগবত পাঠে কাব্যতীর্থ ব্যাকরণ তীর্থ নবদ্বীপ মিশ্র (বারমুণি)।

বিয়ানে সাধু ঠাকুরর প্রতি মূর্তী লেম্পালে দিয়া হাফলং শহরগত এমুরেত্ব হউমুরে হরি কয়নির নমুনাল ডাকুলা ইসান্নাই নাম কীৰ্তনর এলা নাসা দিয়া নগর কীৰ্তন করলাং উহানাত কাদাবারার মানু গুমেত্ব উরাদারা উঠিয়া আহিগ মুজুরে মুজুরে চেয়া চেয়া লগ দরলা হাদি হাদিত নিঙলপি ইমা ইন্দল উলুধনি দিয়া শহরগ আনন্দ মুখর করলা। ঔ দিন উহান নিঙশিং অইলে কাদানি আহের।

নবদ্বীপ মিশ্র গিরকে শান্তিপুৰী ভাষাল ভাগবত পাঠ অকরল। স্বয়ং গৌরঙ্গ মহাপ্রভু তার সঙ্গি বৃন্দল নাম বিলারপারা।

এখুরুম মইপংগ রহেয়া নাম-সংকীৰ্তনহান অকরলা। মূর্তীমান নীলমাধব এইগার ডাকর পুংলেলর লগে কঙালা মুকছির টেঙঠা, অজা গিরিচান গিরকর চিয়উপা ডাকর বারি, কালাসেনা অজা বার নীল অজার ব্রজবুলি এলা উতা যেমন রাধা কৃষ্ণ গোপী সহ কীৰ্তন মণ্ডলীগত আয়লা পারা। এসাদে পালা

কীৰ্তন এহান হাফলং বাসিন্দায় দেহিয়া তাকুলা ইসাৱাৰ চৰণ ধূলি নিলাগা।
 আংকৰতারা, আৰ কুস্বাকা জন্মতিথি এহান অইবতা? সাধু ঠাকুৰৰ অউ
 জন্মতিথি উহানেই হাফলঙে মন্দিৰ আগ হঙমিৰ আশা আহান জৰম অইল।
 ১৯৬৯ সনে শহৰগত বারাদে কালিবাড়ী মন্দিৰগৰ কাদান্ত পৰিত্যক্ত কবৰ স্থান
 উহান নিৰ্দিষ্ট কৰিয়া গাৱৰাপেই তিলয়া দৰখাস্তহান দিলাং। ভক্তেৰ অধিন
 ভগবানৰ কৃপায় আতে আতে জাগাহান পেইলাং। তদানিন্তন উত্তৰ কাছাড়
 জিলাৰ সেক্ৰেটাৰী নিত্যানন্দ দাৱলা গুপু গিৰকে অকাতৰে নিজে আমাৰ
 আতে বি হানৰ পাট্টা উহান দিল। গিৰকৰে হাফলঙৰ বাসিন্দায় পাহুৱানি
 থকনেই। তাৰ অবদান ও সময়ৰ যুবক উতায় হাৰপাসি। এবাকার প্রজন্ময়
 এহান হাৰপানিৰ নিঙে নিংশিঙ কৰে দিলু। গিৰক দৌ অইল।

ও দিনৰ হাৰৌ উহান কিতা বুলিয়া ইকৰতু, ইমাঠাৰ বিসাৰেয়া নাপাউৰি।

ডিল নায়া পিসেকাৰ দিনে আতে দা লেমপালে কদাল, ছাফল, গাতি,
 খুচ্ছেল, দৰিয়া গাৱৰাপেই, নিঙলপি, স্কুলৰ ছাত্ৰ হাবিয়ে কাটা ফুলৰ জঙ্গল
 উগ কাপানিত থেঙইলাং। কাদাত ফুলৰাণী গিথানকে চা-পানি জুগেইল।

কথায় আছে “হবা কামে শতবাদা” পিছেকাৰ দিনে টেঙাৱাৰ যুবক দন
 আহান আতে ঝাঠি, বল্লম দৰিয়া মুঙে উবা অইলাগা, কবৰলিগ তানুৱতা
 লাগেৰ, আমিতে খাঙলাগিয়া উবা অইলাং। হাবি চিনাযানা যুবক থকয়া মধুৰ
 ভাষাৰে আলাপ আলোচনাৰ বিতৰে বুজেয়া দাৱলা গুপু গিৰকৰে ডাহিয়া
 আনিয়া লমইতেগা তানুৱেল মাটি খুলানিত থেঙইলাঙ, পিসে কবৰৰ তলে নৱ
 কংকাল নিকুলেৰ। বাধ্য অয়া মুসলমান কামিলা লগেয়া মাটিহান কাপিয়া
 লমকৰলাং। ৰূপা পয়সাৰ অসুবিধায় কামহান উবা অইলাং। পয়সা নিকলৰ
 ডাঙৰ বুজা আহান আমাৰ গজে পৰিল। সমাজপ্ৰেমী বলদেব গিৰকৰ
 (বাৰমুণি) গৰে গাৱৰাপেই কতগ বয়া বিষ্ণুপ্ৰিয়া মণিপুৰীৰ এশোশিয়েসন আগ
 ১৯৬৯ সনে নাঙে মাত্ৰ গঠন কৰলাং। গৱ প্ৰতি তাংখা আহান মাহানাত চাদা
 দেনাৰ ব্যৱস্থা কৰলাং। সভাপতি, সম্পাদক, কুষাদ্যক্ষ বুলিয়াউ নিৰ্দিষ্ট নাসিল।
 যেগই যেসাদে পাৱলাং উসাদে চাদা কৰানি অকৰলাং। পিসে পিসে শ্ৰীকুসুম
 সিংহ গিৰকৰে (এৱাকা গৌহাটীৰ দক্ষিণগাওঁত আসে) পয়লা কুষাদ্যক্ষ নিযুক্তি
 দিলাং। ভগবানৰ কৃপায় সমাজসেৱী, সাহিত্যিক, শ্ৰদ্ধেয় মনিন্দ্ৰ কুমাৰ সিংহ
 (আই. এফ. এস.) গিৰক হাফলঙে ফৰইলগা গিৰকৰেল ১৯৭৩ সনৰ
 সাধুঠাকুৰৰ জন্মতিথি উহান চাংখল কৰিয়া পালন কৰানি অইল। গিৰকে
 যাবতীয় ৰুক, বাহা যোগান দেনাই ও বসৰেই মন্দিৰগ হংকৰলাং, এহান

পাছুরানির কথাহান নাগই। গিরকর গৃহিনী শুভা গিথানক মন্দিরগর কামে ব্রতি অসিলি। তানুরে নিরোগে দির্ঘ আয়ু কামনা করিয়ার। গাগরা পারর গদ্দি এইগার পুতক মদন এইগারে পয়লাকার পুরুহিতগ নিযুক্তি দেনা অইল। আমার আশা আকাঙ্ক্ষা পূরণ অইল। ১৯৭৬ সনে ইমারজেন্সী জারি করলা, মি হতবাগা এগরে ডিব্রুগড়ে ঠেলা দিলা। ডিব্রুগড় অধ্যায়ে তঙালকরে ইকরলু। নিয়াম হিনপেয়া গেলুগা।

নুৰা নুৰা আইতারা গিরিগিথানির চেষ্টায় মন্দিরগ আরাকউ উন্নতি অসে। ১৯৮১ সনে ভগবানর কৃপায় সেংক বদলি অয়া হাফলঙে আইলু। নিয়ামপারা নুঙেইপা লাগিল। মর লগে লগে আরাক সমাজ নিংপা, সাহিত্যিক বিরেশ রঞ্জন গিরকউ ফরইলগা। ঔবসরেই সাধুঠাকুরর জন্মতিথি ইমা ঠারর ইসালপা অজা গদই, অজা ব্রজকুমার (পচা) গিরকরেল পালা কীর্তন দিয়া হাফলঙে বিষ্ণুপ্রিয়া মণিপুরীর আশা পুংনিং থুমইলাং। বসরহান লমইতে লমইতে ১৯৮২ সন হমানির লাগতি উগৎ মরে করিমগঞ্জে ঠেলা দিলা। করিমগঞ্জর অধ্যায় আরাক আহানাত দেনা অইল। ১৯৮৪ সনে সাহিত্যিক বীরেশ রঞ্জন গিরক (গৌহাটী), কবি শ্রীযুক্ত ননীগোপাল সিংহ গিরক, সমাজকর্মী, সাহিত্যিক সুশীল কুমার সিংহ গিরক সমাজসেবী রাজ্যেশ্বর সিংহ গিরক (মাচুঘাট) তানুর ঠৌরাঙে “টেঙারার চিংখেই” লেরিক আহান প্রকাশ করে দিলা। এহান হাফলঙে বিষ্ণুপ্রিয়া মণিপুরী ইমা ঠারর পয়লাকার মুখ পত্রহান। গিরক গাসিরে হৃদয়ৌপা ধন্যবাদ দেনা অইল।

এসাদে করিয়া হাফলঙে উগ্রপহী রাজ্য উহানর ভিতরে বিষ্ণুপ্রিয়া মণিপুরীর জাতহান পালয়া আসি। আজির হাফলংবাসীরে ধন্যবাদ দেনা থক। তানুর অক্লান্ত পরিশ্রমে আজিও ঔ দিনর গোবিন্দ মন্দির উগ ঙালকরিয়া থসি। তানুরে মি এপেইত থায়া হমা কাংকরুরি।

D.C.- Birendra Nath Chakraborty, C.M.- Govinda Lalgase.

E.M Rev.- Gokul Hojai. ————— Dr. Lady Bonner.

Kuber Suike - Karmungo.

Amarendu Ray Karmungo - Hd. Asslt. Pwd & Sub-De'nian. -

First Parohit - Madan Munderger

চুন্নকর, তানুমতি : কসুমদেব ।

৩২ সুশীল, কসুমদেব ।

Kulajit Singh - Pwd Cont

Deewan Singh - Accell. PWD

Kulajit Singh

Kulendron Singh H.A. PWD.

ডিব্ৰুগড়ৰ পইলাকাৰ অধ্যায়

১৯৭৬ সন— ইমাজেজি বলবৎ কৰলা। এবাৰাৰ মানু হৌগদে উবাৰাৰ মানু এগদে দিল্লীৰ মনমৰজি খলপি খলক কৰানি অকৰলা। মি হতভাগা এগৰে হাফলঙৰ টেঙাৰা উগন্ত ভাৰত তথা আসামৰ হাবিৰ মুঙে ব্ৰহ্মপুত্ৰৰ দক্ষিণ পাৰগত থেঙয়া আসে ডিব্ৰুগড়ে ডিল নাকৰিয়া যানার যাথাং দিলা। মূৰগত বজ্ৰহান পৰিল পাৰা। টেঙাৰাৰ ছৰকাং শহৰগ অইলউ ইচুদিন থায়া উপেইৰ সমাজৰ লগে বানা নুঙশি প্ৰেম-ভক্তি আদান প্ৰধান তথা মন্দিৰ আগ হংকৰিয়া পাৰবন উৎসবৰ বিতৰে হারৌ পিয়ম কৰিয়া আসি এহানাত কিসাদে ঔ মায়া উহান পেইৰাক কৰে সিরিয়া যানা এহান বুকগত জাঠিগ বিধিল পাৰা। বাধ্য অয়া “জয় রাধা রাণী” বুলিয়া যাত্ৰা কৰলু। রেল সড়ক ছাড়া মটৰ সড়কৰ ব্যবস্থা নেই। পাহাড় লাইনগ আগেত্বই দেহেসি। বৰ্ণনা হান হাফলঙৰ অধ্যায়ে দেনা অসে। লামডিং জংশনেত্ব তঙাল রেল গাড়ী আহানাত চৰলু। আজিৰ ব্ৰডগছ নেই। মিটারগজ আসিল। কাৰ্বিআংলং টেঙাৰাগ অইলউ উত্তৰ কাছাড় টেঙাৰাগৰ সাদে অমাটিক নাউ অসে। রেল সড়কগৰ দ্বিয় বারাদে হের নেয়া গাঙ-গৰ পাতিয়া আসি। রেলহানউ তাপ-তাপ খেটের খেটের কৰিয়া চলেসে। আচানক কুনো দৃশ্য নেই। ডিব্ৰুগড় পানার আগে জ্বিৰ লুকা হাকহান থেঙয়া লাগের। পৃথিবীৰ হাবিত্ব মূল্যবান সম্পত্তি থউৰ খনি (পেট্ৰল, কেৰাসিন, ডিজেল) ডিব্ৰুগড় মাটি ইমায় দিনে রাতিয়ে সূৰভী গেইগৰ সাদে জীপুতৰে সেলকম দিতে আসে। ঔ সেলকম উতার অংশ আহান আমিউ পেয়া জিংতা অয়া আসি। কিতাপাৰা হাদিত কম পরলেগা আমাৰতা নিংশাহান কৰানি হিনৰ। নাহার কাটিয়া, নামৰূপ, ধুলিয়াজানৰ পাতালে বুজিলবৰা পেট্ৰল আসে। আজিৰ যুগে পেট্ৰলৰ গজে অন্য কুনো প্ৰাকৃতিক সম্পত্তি নেই এমনকি ছনাউ নাগই। পেট্ৰলৰ দাম বারলে হাবি জিনিষ পত্ৰ দাম বারের। ঔ ডিব্ৰুগড়ৰ কাদাত হুদা পেট্ৰল বুলিয়া নাগই কয়লার খনিউ আসে। ডিগবয়, লিডু, মারঘেরিটায় কয়লা জৰম দিতে আসে। এতা এতা সম্পত্তিয়ে ডিব্ৰুগড় জিলা বুজিল বৰা অয়া আসে। অয়াতে কিতা অয়ব আসামৰ আৰ আৰ শহৰেত্ব ডিব্ৰুগড় শহৰে জিনিষ পত্ৰদাম আঠইপা। ব্ৰহ্মপুত্ৰহানৰ হউপারে ধেমাজী অয়া উত্তৰ লক্ষিমপুৰ শহৰগ। জাহাজে চৰিয়া লালনি লাগের। এবাকা পুলহান দিলা। লম নাসে যার ফলে আসা-যাওয়া

নিয়াম অসুবিধা অর। ডিব্রুগড় শহরগ নিয়াম ডাঙরউ নাগই ছরকাংগউ নাগই। ব্রহ্মপুত্রর পারগত থাইলেউ ডাঙর ডাঙর গুলায় না বুরার। পরিষ্কার পরিচ্ছন্নতাই আসামর বিতরে একনম্বর শহরগ। তার বারাদে শারি শারি চা বাগান এমনকি শহরর বিতরেউ স্বয়ং সম্পূর্ণ অয়া পয়সা জরম দেব পাৰা। চা বাগানে নিঙলপি উতা সম্পাগ বুজিয়া যেসাদে করে চাপাতি নিতারাগা উসাদে করে পয়সা আনিয়া খরচ করতারা। ব্রহ্মপুত্রর পারগত থেঙয়া ডিব্রুগড় মেডিকেল কলেজগ আসেতা থকয়া কাদাউগ লেরি বাগিয়া যারগা। উহান দেহে কুরাউ নেই, মাতে কুরাউ নেই। একমাত্র নুরা মানু উতাই দেহানি মনেয়া ডরপেয়া অইলউ চেইতারাগা।

১৯৫০ সনর বইচালহানর চিহ্ন খানি খানি এবাকাউ আসে। ডিব্রুগড়েত্ব গৌহাটী অয়া দিল্লীত রেল আসে। এবাকা ডিব্রুগড়েত্ব চেমাই পেয়া চলের।

ঐ শহর উগত আমার মানু বিসারেয়া পানা নিয়াম হিনসে। মাত্র চারি পাঁচগ আসি। উতাউ আগরে আগই নাচিনতারা। দেহা দেহি নাউ অইতারা। পইলা থানাহানাত গেলুগা। খাই বেইবুনি মাহি আসি, আমার মানু দুগ পেইলু। আগ পাতিয়ালারগ (সিংলা) গিরকর নাঙহান দলা বুড়া, হাবলদার পদে আসিল। গিরক এবাকা দৌ অসে, আরাক আগ শাল চাপরার গিরক নাংহান পাছরলু, গিরকউ বয়স অসিল। শহরগর এমুরে আগ, হউমুরে আগ, হমবুকে আগ এসাদে সিতারেয়া আসি। আগরে আগই লাকপানি সম্ভবপর নার উহানে তানু রাই সাঙয়া নিজর কামে ব্যস্ত অয়া দিন কাটেয়া আসি।

এহানাত নৃত্য কলা বিসারক নাংকরা ডাকুলা মাধব সিংহ গিরকরে পেয়া নিয়াম হারৌ অইল, গিরকর লগে মর পরিচয় অইল। গিরকে উপেইত আসামী বাঙালী সৌ-জীপুতরে মণিপুরী নাসা বাগাদিয়া নাং পালয়া আসে। নাজিরেয়া দিনে রাতিয়ে নৃত্য-কলাল স্বয়ং সম্পূর্ণ অয়া পরিবার চালেয়া ডাঙর গর আগত ভাড়া করিয়া চৌকিডিঙির লপুকর কাদাং পরিষ্কার পরিচ্ছন্ন অয়া ডাঙর ডাঙর অফিসার— ডি.সি., এস.ডি.অ. রেলরে পি.ডাব্লিউ. ডি. হাবি ডাঙরিয়া মানুর সৌ সুমাৰা বাগাদিয়া আসে। গিরগ ভানুগাসরগ, পিসেদে কমলপুরে আহেসিল। গাঙ-গরে থাইতে কীৰ্তনে, ফাংনাত নীল মাধব এইগার লগে যউকরে বারাসিল বুলিয়া যারি দিল। পিসেদে গৌহাটী আয়া ডিব্রুগড়ে গিয়া নাসা বাগাদিয়া পাঞ্চেল থেংকরিয়া পিসেকার জীবন এহান কাটাসে। গিরকর কথা বার্তা নিয়াম পাৰা কঙালা। ডাঙরীয়া গিরকরে পেয়া নিয়াম হারৌ অইলু। ইমারজেন্সির জালা জন্তনা তানুর গরে গিয়া পাছরলু। গিরকরতা

মুনিসৌ তিনগ, নিঙল সৌ আগ, পরিবার গিথানক উগ সমাজ দরদী, মাদইগাঙ থকয়া আমার ঠার টটরতে উঝা উঝা করে টটরতারা, যেহেতু কাদা বারাদে আমার মানু নেই। মাধব গিরকরে মাদইগাঙ বুলিয়া মাতানি নাইতই, বিষ্ণুপ্রিয়া মণিপুরীর ঠারর মুরুশীগ বুন্ধেউ যাকরের। গীতিস্বামীর প্রিয় ভক্তগ আসিল। গিরক ৮০র গজে অয়া কয়েক বসর আগে দৌর খয়া পাসে। গনিষ্ট পরিচয়, সমবয়সর লগে আকতা অয়া নৃত্য-কলা করেসি ডাকউ বারাসিতা থকয়া হিমপেয়া অইলউ গুরু নীলমাধব এইগা গিরকে সারাদ্ধত ডাক বারাসেগা। ঔ দিনে ডিব্ৰুগড়ে মণিপুরী নৃত্য বাগাদিয়া আমার জাতর কলা-সংস্কৃতি নাং পালকরিয়া থসিল।

আরাক গিরক আগ ডাঃ ভেনু সিংহ (এম.বি.বি.এস., এম.এস.) পাতিয়ালার (সিংলা)। ডিব্ৰুগড় মেডিকেল কলেজে অপারেশন থিয়েটারে মুরুশীগ অয়া আসিল। গিরকে আমার মানু পারিল মাহি চিকিৎসা করল। রেল স্টেশনে আরাক কনাক সৌ আগ আসিল। ইমারজেন্সি সময় রাজধানী দিল্লী হুস বুদ্ধি হারাসিলা। বসরহান ফাইতে না ফাইতে পাগলা মামুদ মঃ বিন তোগলকর রাজধানীহান থকয়া কুনো চিন্তা বিস্তা নেই করিমগঞ্জে বদলি করে দিলা। জয় রাধে বুলিয়া মিউ করিমগঞ্জে গেলুগা। করিমগঞ্জর অধ্যায়হান আরক আহানাত ইকরেসু। এবাকা ডিব্ৰুগড় লয়ার মানু তিনসুকীয়ার লগে একাত্ম অয়া চলেসি এহান হবা যারিহান। মানু নেয়নিয়ৈ মন্দির হংকরানি নারেসি। মাত্র এক-দুই ঘন্টার পথগ থকয়া যানা-আনার অসুবিধা নেই। যে যে গিরিগিথানী ডিব্ৰুগড়ে আসি তিনসুকীয়ার লগে থায়া সমাজর কাম কাজে পাংলাক করিয়া একিন অয়া থানার নিঙে শ্রদ্ধা-ভক্তি কাৎকরুরি।

করিমগঞ্জর পইলাকার অধ্যায়

বৈরাকহানর শাখা নদী কুশিয়ারার পারে নিয়াম পুরানা করিমগঞ্জ শহরগ, সিলেট জিলার মহকুমাগ আসিল। পূর্ব পাকিস্তান সৃষ্টি অনাই করিমগঞ্জ মহকুমা ভারত রাষ্ট্র কাছাড় জিলার অন্তর ভুক্তি অইল। সীমান্তবর্তী সদর শহরগ অনাই আর আর শহরর সাদে তেজ্জাম ডাঙর নায়া হাতে হাতে ডাঙর অইতে আসে। এবাকা করিমগঞ্জ জিলার সদর স্থান অইল।

শহরগত মাত্র তিন চারিগ ছাড়া আমার মানু স্থায়ী অয়া নেই। ঔ দিনে ✓ভূপেন্দ্র সিংহ (মণিরাজ) করিমগঞ্জর স্থায়ী বাসিন্দাগ, নন্দেশ্বর মুখার্জী (পাতিয়ালা) মন সিংহ গিথানক (করিমগঞ্জ) নন্দ সিংহ গিরক (রাজনগর) ভিসাম্বর সিংহ গিরক— বীরবাহু সিংহ গিরক (উনাম)। ইমারজেলি হুদ উগ লমইতেগা ১৯৭৭ সনে হমেইতে মরেউ করিমগঞ্জে ঠেলা দিলা। ঘরর কাদাত দিলাহান থকয়া ১৯৭৬ সনর খামতলে ডিব্রুগড়েত্ব উরা দারা আইলু। মর সভাবহান থকয়া আমার মানু বিসারেয়া থাইলু। গজর গিরিগিথানী উতা ছাড়া আর মানু নাদেছরী। যোগাযোগ ব্যবস্থা নিয়ামপারা সুবিধা অনাই প্রতাপগড় সিংলা লয়াত্ব রেলো বাসে নিক্কা নিক্কা আসা যাবা করতারা। অফিস বিরতির সময়ত দাপা দাপা অয়া ইরেল গ অয়া আমার গরে আইতারা। পয়লা পয়লা মিউ হারৌ অয়া চা পানি দিয়া ছরকাং সেবা আহান করুরি। মানু আর নাইলেউ ২০-৩০ গ আইতারা। পিসে পিসে ভাতউ বিসারতারা, ঔ দিনে গ্যাসর ব্যবস্থা নেই, রুক-বাহার দারউল অউ সময়ে হৌ-ভাত রাদিয়া দেনা এহান নুঙেইহান নাগে। কতদিন আহান ভাতর সেবা করলু, বাধ্য অয়া দরজা বন্দ করিয়া দিনে মানুর গরে থাইলাংগা। কি আচানকহান মর অফিসে গিয়া খবর করেসি। অফিসর মানুরে হার নাপাসি বুলেসি। হবা মানুয়ে হবা বাখান করেছি সাকটি মানু উতাই এক জুট অয়া প্রচার করেসি যে “সঞ্জয় এগ কুকুরগ” দরজা বন্দ করিয়া দাবদের। আরাকউ রটসি তার মইলকে সেঙেল পিদিয়া ভাত রাদিয়া আমি গজর মানু এতারে সেবা করিরি এতা এতা, গজর যারি এহান সম্পূর্ণ হয়হান, এহানাত সিলেটর যারি আহান আহিল।

পূর্ব পাকিস্তান অনার আগে করিমগঞ্জর কোর্ট কাছাড়ী সিলেটে আসিলতা থকয়া আমার আপা বপা বাবা খুরা গাসি নিয়ামপারা হিনপেয়া

সিলেটে গিয়া আমার মানু আসিলা উতারাং বাধ্য অয়া আশ্রয় নিলাগা। ঔ হুদ উগ জারে নারিয়া সিলেটর মানু উতাই দরজা বন্দ করিয়া খেদেসি বুলিয়া হুনলাঙ। যারি উতা হনিয়া আমার অন্তরে লাগিল, এবাকা নিজর গজে পরিল হানতে সিলেটর মানুরে সাকতি বুলিয়া মাতানি নাকরের, এহান পরিস্থিতিয়ে বাধ্য করেরহান। করিমগঞ্জ পুরানা শহর এগ বৃটিশ আমলে হঙসেগ রেল জংশন আগ আসে। করিমগঞ্জেত্ব প্রতাপগড় অয়া কলকলিঘাট পেয়া আসিল, এবাকা আগরতলা পেয়া গেসেগা। সিংলা পরগনা অয়া দুপ্তভছড়া পেয়া আসে। বদরপুর কাটাখাল জংশন অয়া শিলচর চলের। করিমগঞ্জেত্ব মহিষাসন অয়া বাংলাদেশে হমাসেগা। এবাকা বাংলাদেশে রেল বন্দ। মটর সড়কউ রেল সড়কর বারাদে অয়া সুটেসে। কুনো কুনো যাগায় কাপা কাপি অসে। দিনে রাতিয়ে অবাদে রেল, মটর ট্রাক চলতে আসে। মাত্র গোলায় সময় নিয়ামপারা অসুবিধা অর। কুনো কুনো সময় যোগাযোগ ব্যবস্থা সম্পূর্ণ বন্দ অর অবশ্য শহরগ গোলায় পানিয়ে না বুরার। হাবি পানি বাংলাদেশেদে যারগা।

১৯৭৭ সন হমেইতে হমেইতে ইমারজেলি হান উঠিল। ইলেকশনউ অইল। সুযোগ উহানাত সাধু ঠাকুরর জন্মতিথি পালনর ঠৌরাং করানি অইল। ভূপেন্দ্র গিরকর নিজস্ব প্রেসগত (দৃষ্টিপাত) সম্বু সাগরর পারে বনা অইল। ঔদিন ভূপেন্দ্র সিংহ গিরক, নন্দেশ্বর মুখার্জী গিরক, বিযান্তর সিংহ গিরক, বীরবাহু সিংহ গিরক, লগে মিউ (সঞ্জয়) বয়া লেপকরলাং।

ইসালপার মারেঙে— এলা শিরোমণি অজাগুরু কালাসেনা রাজকুমার (পাথারকান্দি) কুকিল কণ্ঠি অজাগুরু নীল সিংহ (বিহার)।

ডাকুলার মারেঙে — অজা সুশীল সিংহ গিরক (শিলচর, হিঙ্গারী), অজা মণি সিংহ গিরক (ত্রিপুরা), মঞ্চগ করিমগঞ্জ গভট স্কুলর মাঠগত কালী পূজার পেণ্ডলগত ঠিক অইল। নন্দেশ্বর গিরকরে দায়ীত্ব দেনা অইল।

অন্য কুন লেইত্রেঙ নাকরিয়া মাত্র পালা সংকীর্তনহান অকরলাং। মুঙে লক্ষী বাজার সড়কগ, কাদাবারাদে ডাঙর ডাঙর গাছ বৃক্ষ আসে। মঞ্চগউ চেল নায়া সড়কগ বুজিয়া আকয়া গাছে কায়া চেইলা। করিমগঞ্জে আয়তারা বাজারুলি হিন্দু মুসলমান খাং লাগিয়া উপেইত বাজারহান বহেইলা।

কালাসেনার কেথকপা এলা, নাসার টেংঠা, নীল অজার গামভিজ বংগী, ডাকুলার চি-য়ৌপা বারি দেহিয়া বিজয়হান অইলতা পেয়া মানু উতা রা রা করিয়া থাইলা। সুপ আধার অইল। উপেইতেই বাজার খরচ লনা-বেসানি করিয়া গরে আলথক অইলা।

করিমগঞ্জে ১৯৭৭ সন এহানেই পয়লাকার উৎসবহান। পরবর্তী দুই তিন বসর বিশেষ অসুবিধা অয়া পালন করানি নারেসি। তবে স্থায়ী বাসিন্দায় হারপেইলা যে এপেইত বিষুপ্ৰিয়া মণিপুরী সম্প্রদায় আহান মজবুত অয়া আসি। মি হতভাগা এগ ১৯৭৯ সনে হাইলাকান্দিত গেলুগা, এহানাত হাইলাকান্দির অধ্যায়হান তঙাল করে ইকরলু।

তিনসুকিয়া, হাফলং অয়া সেংক ১৯৮২ সনে করিমগঞ্জে আইলু। এহানাত সাধুবাবার কৃপায় ১৯৮৩ সনে সমাজ নিংপা, সাহিত্যিক গোপেন্দ্র সিংহ (কচুবারী) এ. সি. এস., সমাজপ্রেমী ধনসেনা সিংহ (কাটাবারী, এবাকা গৌহাটী), শ্রীনন্দ গিরক (রাজনগর) পিসে পিসে সমাজসেবী সাহিত্যিক গবেষক মনিন্দ্র কুমার সিংহ গিরক (বারমুণি) আই.এফ.এস., শ্রী রাজকুমার সিংহ গিরক (নালীবারী), গীতা-ভাগবত পাঠক শ্রীনীলমণি সিংহ গিরক (উনাম, এবাকা গৌহাটী) ডাঙর ডাঙর পদে উন্নতি অয়া করিমগঞ্জে ফরইলাগা। এগদে বার রাজনৈতিক ভূপেন্দ্র সিংহ গিরক স্থায়ী বসতি অয়া আসে। আমারতা হবার গজে হবা অইল। না জিরেয়া সাধুবাবার উৎসব তঙাল তঙাল মঞ্চে পালন করানি অকরলাং। ক্রমান্বয়ে রাসলীলা জলসার আকারে অজা গোকুল মাষ্টার (পাথারকান্দি), রাকখুরাল-রাস (মেহেরপুর), নাগরা পাটি ঢোলক (মেহেরপুর) করিমগঞ্জ শহরগ তুলপার অইল। ছদ্মমেউ করিমগঞ্জবাসিয়ে আমার সাধুঠাকুরর জন্মতিথি এহান বাসেয়া থাইলা। পেলনায়া নাগরা-ঢোলক পাটি দুর্গাপূজাতৌ আনুৰেইলা।

এহানাত ছাত্রাবাসর য়ারিহান আহিল— আমার পূর্বসূরী সমাজসেবী কলাবাবু সিংহ (উনাম) গিরকর আগ্রহে তার মারুপ মাসাঙ সমাজ কর্মী উতারেল সিংলা, প্রতাপগড় লয়ার বিষুপ্ৰিয়া মণিপুরীরাংত চাদা করিয়া ছাত্রাবাস আগ হংকরানির নিঙে করিমগঞ্জ শহরগর বারাদে শিববাড়ীর কাদাত জাগা আহান লয়া ছাত্রাবাসগ পয়সার অভাবে হংকরে নারিয়া বেলেয়া থসি। নিয়ামপারা দিন লালয়া গেলগা, এতদিনে কলাবাবু গিরকৌ দৌ অইল। পরিত্যক্ত লসি জাগা উহানউ কুন খবরা খবর নেই। জাগাহানতে থাক কাগজ পত্রউ মিমুত অয়া গেসেগা। মুহকুমাধিপতি গোপেন্দ্র সিংহ গিরকর আপ্রাণ চেষ্টাই প্রমাণ পত্র সংগ্রহ করিয়া দখল করেসি জাগা উহান নিকালানির ব্যবস্থা অইল। জাগাহানর মুঙে শিববাড়ী রোড, পিঠি বারাদে লাখ নেই পানিহান, গজে জারমানি কচু বুজিয়া আসে আকবারাদে কলেজর বালগ। আরাক আগদে ইলেকট্রীকর গুদামগ, আরাক আগদে স্থানীয় মানু গিরক উগই পারিল মাহি দখল করিয়া নারিকল, গুৱা, খলর বারি হংকরেসে গাছ উতাউ ডাঙর

৩৮ নন্দীমণ্ডল সিংহ . FR . Wandeswar mukherjee -
Narendran - D. G. Gita mukherjee

ডাঙর অয়া ফল দরের। ঔ জাগা উহান লেপকরতে স্থানীয় প্রতাপশালী বাসিন্দা, ডি.সি., থানাধিপতির সহযোগিতাই গাছ উতা কাপিয়া গাত উগত বেলেয়া জাগাহানর চারিসীমা ঠিক করলাং। মুষ্টিমেয় আমার মানু কতগই পাংকাল থেতকরিয়া জাগা উহান উদ্ধার করে পারলাং এহান ছরকাং কথাহান নাগই, ঔ দিন উহান নিংশিং অইলে গারির রম উবার। জালাই উগ থলকরিয়া ছরকাং মন্দিরসৌ আগ লগে দিচালিয়া মালঠেপ আগ হংকরিয়া ১৯৮৬ সনে সাধুবাবার জন্ম তিথির দিনে করিমগঞ্জর নাংকরা ব্যবসায়ী মনোরঞ্জন বণিক গিরকে মন্দিরগর সম্পূর্ণ তাংখা সাহায্য করেসিলতা থকয়া গিরকরে থপুগ দিয়া মুরুখীগ লেপকরিয়া সাংকা করলাং। গিরকর অবদান উহান পাছরানি নাইতই। হুদা করিমগঞ্জবাসী বুলিয়া নাগই নিখিল বিষ্ণুপ্রিয়া মণিপুরী সমাজে গিরকরে শ্রদ্ধা দেনা থক। ঔ দিনে কচুবারীর পদাবলীর রাণী রেণু সিংহ গিথানকরেল নিমাই সন্ন্যাস পালা দিয়া বাঙালী সমাজরাংত নিয়ামপারা প্রশংসা পেইলাং। ছাত্রাবাসগ অকরাগ দেনা অইল, ছাত্র আনা অকরলা। কাদ্দাত নীলমণি সিংহ গিরক আসিলতা থকয়া গিরকরাং হাবিতা সমজাদিয়া নিজর নিজর পথ দরলাং। নীলমণি গিরকৌ স্থানীয় বাসিন্দা নন্দেশ্বর মুখার্জী গিরকরাং মন্দির তথা ছাত্রাবাস উগ সমজাদিয়া চাকরীর দায়িত্ব নিয়া গৌহাটীত আহেসে। এবাকা অবসরপ্রাপ্ত অয়া গর-দোরার হংকরিয়া বরবারীত আসে।

করিমগঞ্জর সাধুবাবার মন্দিরগ বার ছাত্রাবাসগর যারি এহান পিসেকার প্রজন্মই হারপানিরকা তুলিয়া দরেইলুতা।

Rafulla - Drier - Forest,

মন্দিরগ

M.K. Saita - IFS. - October, 1986 - Dist Dec 1986 •

Earth filling, Cement, Rod, Timber, etc... Collected
by Shri Gopendra Kr. Saita • I had seen bldg
it under construction. Gopen showed me.

হাইলাকান্দির পইলাকার অধ্যায়

১৯৭৯ সনের য়ারিহান— করিমগঞ্জে বদলি অয়া আইলু। হাইলাকান্দি জিলার সদর স্থান, হুরকাং শহরগ। ধলেশ্বরী সরাহানর পারগত আসে। সরকারর পানীর যোগানর ব্যবস্থা নেই। শহরর হমবুকে ডাঙর সরকারী পহুরীআগ আসে। নিজর খরচল পানী আনানি লাগের। হুরকাং শহরগ থকয়া পরিষ্কার অয়া আসে। গুলায় নাবুরার। ১৯৭৯ সনে আসুর বিদেশী খেদা আন্দোলনর অকরাগ। সুযোগ সন্দানীয়ে সুযোগ পেইলা দিগালি পাথারি, আন্দাদুন্দা উৎপাত করানি অকরলা, গাড়ী ঘোরা বন্দ, দোকান পাট বন্দ, স্কুল-কলেজ বন্দ, এতা এতাল সাধারণ মানু অচলা অবস্থা অইল। বাধ্য অয়া শহরগত কারফিউ বলবৎ অইল। চারিয়বারাদে মুসলমান সম্প্রদায় বেরেরা আসি। শহরগত বাঙালীর সংখ্যা নিয়াম। আমার মানু মুষ্টিমেয় কতগ আসি। শহরগর খানি দুরেইত জাপিরবন পরগনা বার শিবরাজন, কাটাখালে আমার মানু গাঙ পাতিয়া আসি। ঔ দিনে শহরগত আসিলা আমার মানুর বিতরে ডাঃ রণধীর রাজকুমার (পাথারকান্দি), ডাঃ দেবেন সিংহ (ত্রিপুরা), লালমোহন সিংহ (ট্রেজারার হুনাপুর), বীরেশ রঞ্জন সিংহ (ভগতপুর এবাকা গৌহাটী), প্রফেসর ব্রজেন্দ্র কুমার সিংহ (শিবরাজন), প্রফেসর বরুন সিংহ (মাচুঘাট), সমরেন্দ্র সিংহ (পুতুল বারমুনি), সুরর রাজা সুরনাথ সিংহ (ভগতপুর), আরাকৌ কতগ মানু আসিলা।

• গজর মুরুম্বী গিরিখিথানি এতার ঠৌরাঙে সাধুঠাকুরর জন্ম তিথিহান পালন করানিত লেপইলাং। মন্দির মালঠেপ নেই। প্রঃ ব্রজেন্দ্র গিরকর গরে মঞ্চগ ঠিক করলাং।

উৎসবহান মাত্র পদাবলী কীর্তনর ব্যবস্থা করানি অইল। বারমুনির নাংকরা জীবাই মিশ্র গিরকরে আনানি অইল।

মিশ্র গিরকর চেহারাগ চেইতে অবিকল গৌরাজ মহাপ্রভু পারা, বিয়ানকার নগর কীর্তনে দেহিয়া শহরগর মানু হারৌ অইলা।

পালাহান নিমাই সন্ন্যাস— শহরগর মানু হাবি পুলইলাগা। উঠানে মাঙ্কলে গরে চল নাইলা। শুদ্ধ, পরিষ্কার শান্তিপুри ভাষাল অকরল। হুনিয়া বাঙালী সমাজে নিয়ামপারা বাখান করলা। ঔ দিনে হাইলাকান্দি শহরে

বিষ্ণুপ্রিয়া মণিপুরীর অস্থিত্ব প্রকাশ অইল। ঔহানেই পয়লাকার উৎসবহান। হাইলাকান্দিত সাধুঠাকুরর জন্মতিথিহান পালন করানি অইল। করুণাময় সাধুঠাকুরর কৃপাই পিসেদে মন্দির আগ হঙইল। ঔ ছরকাং শহর উগতৌ বিষ্ণুপ্রিয়া মণিপুরী পালয়া আসি। ১৯৭৯ সন এহান আজির হাইলাকান্দিবাসীয়ে পাছরানি থক নেই। আরাকউ পিসে পিসে হাইলাকান্দিত শহর উগ ডাঙর অনায় আরাক মন্দির আগ গঠন অসে। আজির হাইলাকান্দির দ্বিয় মন্দির কমিটিরে অনুরোধ থউরি ১৯৮০ সনেত্ত আজি পেয়া ঔ মন্দিরর ধারাবাহিক করে লেইত্রেং উতা লেংকরিয়া সম্পাদক গিরকরাং ফৌকরে দিলে নিয়াম হারৌ অইতাঙাই। পরর সংখ্যাত লিংখাত করানি অইতৈ। ঔহানর নিঙে হাইলাকান্দিবাসীয়ে শ্রদ্ধা নিবেদন করিয়া আজিরকা লমকরলু।

তিনসুকিয়ার পইলাকার অধ্যায়

তিনসুকিয়া ডিব্ৰুগড় জিলার মহকুমাগ। ভারত তথা উত্তর পূৰ্বাঞ্চলৰ হাবিৰ মুঙে খামতলৰ রেল জংশনগ। ছৰকাং শহৰগ অইলেউ ব্যবসা বাণিজ্যে গৌহাটীৰ থাংনাত বুলিয়া প্রসিদ্ধ আসে। ভারতৰ ব্যবসায় রাজা মারুৱাৰী বার কঠুৰ পৰিশ্ৰমি বিহাৰীৰ শহৰগ অসে বুল্লেউ যাকরের। শহৰগৰ চাৰিয়গদে চা-বাগান পারেং পারেং অয়া বিরাজ করেসে। চা-বাগানৰ মনোরম দৃশ্যবলী মনহান আকর্শন করেৰ। শহৰগৰ বারাদে জুরিগুরি গাঙে থায়া হিমালয় টেঙাৰাগৰ বরফৰ চুড়া উতা চেইতে আহিথম জিলকার। চা বাগানৰ কেন্দ্ৰবিন্দু তিনসুকিয়া শহৰ উগতউ আমার মানু ফৰপারেসিগা। অবশ্য নিয়ামতে নাগৈ, আসুলিয়া পিসুলিয়া ১৫ বা ২০ গ অইতাই।

উতার বিতরে বঠা গিরক (পাথারকান্দি), রাজেশ্বৰ সিংহ গিরক (বারমুণি), হরিদাস গিরক (ত্রিপুরা), হরি গিরক (বিলবাড়ী), মণি সিংহ গিরক (শিলচর হিংগাৰী পুলিশ)।

১৯৮০ সন আসামৰ বিদেশী খেদা আন্দোলনৰ জ্বিগ ব্ৰহ্ম পুত্ৰ উপত্যকাত দাও দাও কৰিয়া লাগেৰ তিনসুকিয়াত ঔ জ্বিগ হাকহান ফৰসেগা। মি হতবাগা এগরে হাইলাকান্দিহ, তিনসুকিয়ার জ্বি উগত ঠেলা দিলা। দিনে রাতিয়ে কারফিউ (ঘৰবন্দি) আইন বলবৎ আসে। দেখলেই গুলি। ১২ ঘন্টা নাগই, ২৪ ঘন্টাও নাগই, দীৰ্ঘ ৭২ ঘন্টার পরে মাত্ৰ ২ ঘন্টারকা এরা দিতারা। উতার বিতরে শহৰগৰ বারাদে গাঙ গাঙ রাতি জ্বি লাগাইতারা, পৰিস্থিতিহান নিয়ামপারা সাক্তি অইল। ঔ অসুবিধার বিতরে বহাগ বিহু আহিল। পেইরাক করে গাৰরাপেই, পুরিজেলেই তানুর পেঁপা, ঢোল রহেয়া বিহু নৃত্য কৰিয়া শহৰগ হারৌৰ মেল কৰিয়া গেলাগা, প্রসাশনৌ কিত্তাউ করে নারল।

তেললাম আমারতাউ খেচুরী পালিহান আহিল। শহৰগৰ হম্বুকে পার্বতী রোডে রাজেশ্বৰ সিংহ গিরকৰ গৰে আগরে আগই বিসারেয়া ডাহা ডাহি কৰিয়া কতগই তিলয়া মাত্ৰ খেচুরী খেয়া আত্মতুষ্টি করলাং এহান তিনসুকিয়ার পইলাকার মনগড়া খেচুরী পালিহান। পৰিস্থিতিহান আরাকৌ সাক্তি অইল।

চেইতে চেইতে সাধুঠাকুরৰ জন্মতিথিহানৌ মুঙহানাত আহিল। বঠা গিরকৰ ঠৌরাঙে তার গৰে থারমেলে অন্নপ্রসাদ ভোজন করলাং।

অন্নভোজনর পরে বটা গিরকে আঙুলিগল ইসারা দিয়া দেহেইল— এরে খালি জাগাহানাত মন্দিরগ হংকরানি পারতাঙাই, ঔ দিনেই আমার মনে মন্দিরগর যাত্রাগ লেপইল পারা। ১৯৮০ সনর খামতলে মর অনুরোধে হাফলঙে দিলা। বটা গিরকর ঔ কথামতে পিসে পিসে তিনসুকীয়াত আহেদেসি গিরিগিথানিয়ে মন্দির আগ ১৯৮৭ সনে গঠন করেসি। উত্তর পূর্বাঞ্চলে বিষ্ণুপ্রিয়া মণিপুরী নাঙ পালয়া আসি। আজির যোরহাট, ডিব্রুগড়, তিনসুকীয়াবাসীর মঙ্গল কামনা করিয়া লমকরলু।

মাইবঙৰ পইলাকাৰ অধ্যায়হান

১৭০০ সনৰ হাকতাকে আহোম আক্ৰমণে পৰাজিত অয়া কাছাড়ী রাজা ডিমাপুৰ বেলেয়া মাইবঙে রাজধানী হংকবেছে। কালক্ৰমে মাইবং হুৰকাং শহৰগ অয়া পালইল, কাদাং বেল ইষ্টেশনগ আছে। টেঙাৱাৰ পেটে পেটে মাছৰ ছড়াহান দাপদেৰ ঔ ছড়াহানৰ পাৰগত ডাঙৰ হিলৰ ঘৰ আগ আছে। রেল হানাত থায়া কুপকৰে চেইলে দেহিহাৰ। আৰকউ স্মৃতি চিহ্ন হিলৰ দেৰ-দেৱীৰ মূৰ্তী মেংসেলহান অয়া আসে। ঔ হিল উতাই কাছাড়ী রাজাৰ রাজত্বৰ মেইথংহান দেহা পেয়াৰ। মাইবঙে আমাৰ মানু মাত্ৰ ২০/২৫ গ আছি। ঔ গিৰিগিথানীৰ নাঙ দেনা অইল— সৰ্বশ্ৰী মোহিনী মোহন সিংহ, বিপ্লৱ সিংহ, নৱেন্দ্ৰ সিংহ, হৰিপদ সিংহ, দুলাল সিংহ, ময়ূৰ সিংহ, সুভাষ সিংহ, শ্ৰীমতী কুঞ্জৱাণী সিংহ, শ্ৰীমতী ললিতা সিংহ, শ্ৰীমতী সুশিলা সিংহ, শ্ৰীমতী সুমিত্ৰা সিংহ, শ্ৰীমতী কমলা মুখাৰ্জী, শ্যামসুন্দৰ মিশ্ৰ, দেবেন, য্যোতিকান্ত, মণিসেনা, শ্ৰীমতী রেখা এতাৰ বিতৰে অনেক গিৰিগিথানী হয় বদলি অয়া গেলাগা নাহয় অবসৰ নিয়া গেলাগা। নিয়াম হিমপেয়া উগ্ৰপত্নীৰ গাছজাৱৰ মাৰাউগত ড়ৰ ভয় নাপেয়া ১৯৮৫ সনে মন্দিৰ আগ হংকৰেছি। ঔ হুৰকাং শহৰ উগ কাছাড়ী জাতৰ হাদিত বিষ্ণুপ্ৰিয়া মণিপুৰী অস্থিত্বহান পালকৰেছি এহান আমাৰ জাতৰ গৌৰৱ হান। তানুৰে হৃদয়উপা হমা কাতকৰুৱি।

গজৰ গিৰিগিথানী এতাৰ নাঙ মাইবঙ হাইস্কুলৰ শিক্ষক শ্ৰীপ্ৰতাপ সিংহ (নুনু)। গিৰকৰাংত সংগ্ৰহ কৰলু। গিৰক ছাত্ৰ অৱস্থায় হাফলঙে সমাজৰ কামে হেইনিং অয়া লেইসি কৰল। এবাকা শিক্ষক জীৱনে থায়া মাইবঙে সমাজৰ কামে একিন অয়া আছে। উতাৱকা তাৰে ঔনাপা থাকাত দেনা অৱ।

মৃদাঙ্গচাৰ্য গুৰু নীলমাধব মুখার্জীৰ পইলাকাৰ অধ্যায় আহান

স্বৰ্গীয় নীলমাধব এইগা গিরক ডাকৰ বিদ্যাহান আসিলতা থকয়া বিষ্ণুপ্ৰিয়া মণিপুৰী সমাজে হাবি লয়ার মানুৰে হবা কৰে চিনেসি। নুৰা কৰে পৰিচয় দেনা এহান চুনা নার। অনেক লেখক লেখিকায় ভিবিন্ন সুখপত্ৰে এইগাৰ জীবনী ইকৰিয়া প্ৰকাশ কৰে দেসি।

নিৰোগে দীৰ্ঘ আয়ুল থায়া নিক্কা-নিক্কা কীৰ্তনে মহাসংকীৰ্তনে, শাদ্ধে, ফাংনাত ডাক বাৰেয়া লগে নাসা বাগাদিয়া দেশবিদেশ তথা বোম্বেৰ সিনেমা জগতে গিয়া ফৰসেগা এমনকি আসামৰ মণিপাল্লা ভূপেন হাজৰিকাৰ লগে আকতা অয়া ডাঙৰ ডাঙৰ মঞ্চ গায়ন-বায়ন শাস্ত্ৰিয় নৃত্য, মণিপুৰী নৃত্য, নেপালি নৃত্য দিয়া বুলিয়া আসিল। শেষ জীবনে কীৰ্তন মাপুগৰ ফামে অলংকৃত কৰিয়া নৃত্য ধামে গেলগা।

১৯৬২ সনে গৌহাটীৰ আকাশবানীৰ বিষ্ণুপ্ৰিয়া মণিপুৰী ইমা ঠাৱল লেংকরা এলাহান পইলা প্ৰকাশ কৰেসিল।

উঠ অ ইমা গাসি

ৰাজাৰ গাঙ মাদই গাঙ হজাক অয়া আসি।

ও গিরকৰ কিস্তী উতা মি হুৰকাং এগই কিতাউ বা ইকৰতু। মি গিরকৰ জন্ম-ভূমি লোৱাৰপুৰা গাঙে আহিত দেহা ঘটনা আহান ইকৰুৱি।

মি উবাকা মাত্ৰ ৮/৯ বসৰ অসু। এইগা গিরক গাৱৰাপা অয়া লুহং কৰেসে। এইগা গিরক আজিৰ সাদে মুটা নাসিল। পাতলা-চাতলা চেহাৰাগল ডাক বাৰেইতে খুমগৰ সাদে বুলে বুলে, ফালদিয়া ফিলাদিয়া বাৰেইল। এবাকার কেথক-মেথক, নাসাৰ-টেংঠা, মুকসি-কায়দা মোসন ও সময়ত নাদেইল। পয়লা পয়লা ইসাল্লা হিকেসিল। পিসে নারগৰ অসুবিধায় বাপক আতল এইগা ডাকুলাগ আসিল হান্তে খুন্না পুতক নীলমাধব এইগাৰাং তাৰ বিদ্যাহান সিলকৰে দিল। বাপকৰ স্নেহশীৰ্ষাদ লয়া এইগা গিরক মণিপুৰে গেসেগা।

ডাকৰ বিদ্যাহানৰ লগে নৃত্য-কলা হিকিয়া আল্খক অয়া আহিল। এইগা গিরক কঠুৰ পৰিশ্ৰমী বাৰ সাহসী পুৰুষগ আসিল। তানুৰ গৱৰ পিঠিহানাত

লঙ্গাই ছড়াহানর পারগ থেঙয়া ডাঙর কাটা উসক জঙ্গল উগ সেংকরিয়া মৌ খেতি করলা। ঔ জাগা উহান “ভাঙ্গাগ” বুলতারা। সময় আহানাত লঙ্গাই ছড়াহান লেরি বাগিয়া গরর কাদাত পাসিলগা। দৌর কৃপায় ডাঙর গুলা আহানাত ফিঠির টেঙাৱাগর পটেদে বুলন দিয়া গেসেগা। ঔ পানির জালাই উগ তেৱাউনি নল গাগৱার জঙ্গলে বুজেসে। ঔ জঙ্গল উগত হাদি হাদিত বাক আগ আয়া থাইলগা। এইগা গিরকর ডর-ভয় নেই।

আকদিন মৌ খানার নিঙে গরর লাভা মইস আগত চরিয়া গেলগা। মৌজার সেদেইতে আতে নাতে দরা পরলু। ডরহানে থুর-থুরেই কাপানি অকরলু। এইগাই মর অবস্থাহান দেহিয়া বানা পেয়া উল্টা মৌ খানার যাতাং দিল। ঔ দিনেই মরে সঞ্জয় মহাভারতর বুলিয়া নাংহান থইল। মর সৌভাগ্য—শেষ জীবনে এইগারে পেয়া সার্থক করলু।

১৯৫১ সনর য়ারিহান— গাঙর গিরক আগই মহাসংকীৰ্ত্তন (সেন্নানাম) আহান হানজাসে। বিষ্ণুর ভক্ত বিষ্ণুপ্ৰিয়া মণিপুৰী ধৰ্মর পদগ নিয়ামপাৱা বিসারতারা তা থকয়া নীলমাধব এইগা গিরক একেত বামুনগ বার হবা ডাকুলাগ। থপু গিরকে ব্ৰহ্ম পালাহানল অকরাগ দেনা মনেয়া এইগা গিরকরে ঠিক করল। নিয়মে ডাঙর পালাহান আগে অনা থক। গাঙর ডাকুলগ বামুনগ নাগই। ঔ ডাকুলা গিরকে দরিয়া বহিল। গাঙে বিচাৰউ করলা কুনো সিদ্ধান্ত না ফৰইলাগা। থপু গিরকর একাগ্ৰতা দেহিয়া এইগা গিরকে মাতল “আজিঙ গাঙর ডাকুলাগর বারহান মি নিলুগা।” গাঙহান হাবি হারৌ অইলা মাত্ৰ মুষ্টিমেয় কতগই হবা নাপেইলা।

বিধিমতে পালাহান অকরলা— ঔ দিনকার বারনি উহান একমাত্ৰ দেহেসি উতাই মাতে পারতাই। লগরগউ গাঙর মহন্ত সিংহ গিরক, এইগারে জিঙিং বুলিয়া বারার, জুৱাহান নিয়াম খাটেসিলা। গিরক বহুদিন লগে আসিল, এইগা বিদেশে জানাই গিরক আকখুলাগ অইল। কীৰ্ত্তনে মেলহান আসে মেলহানর হাদি উগত এইগা গিরকে যউক্কে বারেয়া ডাকগ ফারল। কাদাত গরগ আসেহান আৱাক ডাক আগ আনিয়া বাৱেইল। হবা গিরিগিথানীয়ে থাকাত দিয়া বুজিল বৱা প্ৰেম করলা। বিরুধি মানুৱে মাতলা নিয়ামহান নাকৱানির ফলে ডাকগ ফাৱিল। কতর য়ারিপরি অইলেরগায়উ ডাকগ ফাৱিল এহানতে মিমুত করে নাৱলা। কতদিন পরে প্ৰতাপগড়ে পাথারকান্দি লয়াত অধিবাস আহানাত ডাকগ ফাৱানিয়ে এবাকাতে চাইৱৱাৱাদে নাঙহান সিতাৱল।

হুনিয়া, হাৱপেয়া, দেহিয়া বিষ্ণুপ্ৰিয়া মণিপুৰীৰ কলা-বিদ্যাৰ শিৰোমণি কলা-গুৰু বিপিন সিংহ (বাৱমুনি) গিরকে এইগারে নিয়া গেলগা।

১৯৫১ সন এহান এইগা গিরকর জীবনর পইলাকার অধ্যায়হান।
এইগারে গাঙর মানুৰে নীলবাবু বুলিয়া নাঙহান থসিলা। এইগার উপাদি শৰ্ম্মা।
পিসে তা নিজে নীলমাধব মুখার্জী নাঙ নেসেগা। মানু মরণশীল— প্রকৃতির
নিয়ম নিতি মানিয়া নীরোগে দীৰ্ঘ আয়ুল জীবন-যাপন করিয়া ১৯১১ সনর
এপ্রিলে বিষুগপ্রিয়া মণিপুরীর থামপাল ফুলগ জড়িয়া পরিল। আমার ডাঙর
খতি আহান অইল এহান পূরণ নাইতই।

মদনমোহন মুখার্জীর ছরকাঙ অধ্যায় আহান

কবি, সাহিত্যিক, স্বর্গীয় মদন মুখার্জী গিরকরে আমার সমাজে নাচিনেকুরা নেই। গিরকর জীবনী তঙাল তঙাল মুখপত্রে, লেরিকে অনেক গুনী-জ্ঞানী গিরিগিথানীয়ে লেংকরেসি মি মাত্র গিরকর স্মৃতি আহান ইকরুরি।

১৯৫৭ সন— লোয়ারপুরা গাঙর বার মদন এইগা গিরকর জীবনর পয়লাকার হবা অধ্যায় আহান।

লোয়ারপোরা গাঙর খামতলে, শিবরগুল গাঙর অকরাগত এম.ই. স্কুল আগ আসে। ঔ স্কুল উগর হেড মাষ্টারগ অসিলতাই কবি, সাহিত্যিক ঐতিহাসিক গবেষক স্বর্গীয় মহেন্দ্র সিংহ গিরকর পুতক স্বর্গীয় বামুদেব সিংহ গিরক। ঔ হাকতাকে লয়া উগ জঙ্গল কাপিয়া আমার মানু পরেসিলাগা। বামুদেব গিরক আমার সমাজ দরদী অসিল তা থকয়া গাঙর মঙ্গলার্থে ঔ জঙ্গল উগৎ এম, ই, স্কুলগর লগে হাই স্কুল আগ খুলানির ঠৌরাঙে বিসারতে বিসারতে সিংলা লয়ার পাচডালির সম্ভ্রান্ত বামুন পরিবার মদন মোহন এইগারে আনিয়া আহিল। বামুনগ থকয়া পইলা পইলা লোয়ারপুরা পুরোহিত বাবাই ঠাকুর শর্মা গিরকর গরে থাইল। এইগা গিরকর চেহেরাগ মুঙে মাতঙে মহাপ্রভুগ পারা। তার সাৎ উহান দেহিয়া কুনগৈ বানা নাপেইতাইগ? রংহানৌ আনদির গাঠিগ পারা, গিরক আহানিয়ে লোয়ারপোরা গাঙ এহানাত জোনাক পালইল পারা।

নুৰা হাইস্কুলগ থকয়া বেতনৌ নেই। মাত্র ছাত্র-ছাত্রীর মাসিক দিতারা পয়সা উতাল চলানি অর। উতার গজে স্কুলগর সম্পূর্ণ দায়িত্বহান থাইল। গিরক ছাত্র-জীবনেত্তই লেখকগ অসে। ঔ গিরকরে পেয়া লোয়ারপুরা মানু হারৌর সীমা নেয়ইল। নিষ্ঠা আকাঙ্ক্ষা নিয়া স্কুলে ছাত্র ছাত্রীরে নিক্কাকার পরা বাগাদিয়া সেন্দাত ইরেলগ অয়া তার কুঠাগত আহের। কাদ্দাত ইমাঠারর নুৰা ইসালপা গদই অজা আসেতা থকয়া গিরকর লগে আকসাটে বয়া এলা লেংকরাত থেঙইলা। গদই অজা আগেত্তই বাংলা-ব্রজবুলী ঠারর ইসালপাগ। তার অজা গুরু ময়ূর সিংহ গিরক হামেসাই বাংলা ঠারর ইসালপাগ। কালর ছংগ জাতেয়া আহেরহান দেহিয়া অজা গদই আমার ঠারেদে বুলনদিল। ঔ ছং উগর ডেউ আগল মদন এইগাই আমার গাঙে ফরইলগা।

অকরাগ— ইসালপার বাংলা এলাহান “দেখ সখি কিহে শুভা” আমার ঠারল আনলা “চেইনে সখি কতিয়ৌ হবা”। গদই অজা তার নিজর নার তাল টেঙঠা, ভঙ্গি নিয়মপারা জ্ঞান আসেতা থকয়া প্রতাপগড় লয়াত গদই হিংগালা লয়াত পচা অজা সমাজর নুৰা তারাগি অয়া নিকুল্লা। চেইতে চেইতে কাছাড়, ত্রিপুরা, ভানুগাছ, সিলেটে ফৰইলাগা।

এগদে মদন এইগাও গুমে নাথাসে, তেল্লাম নাটক দুহান লেংকরল। আহান ‘রূপায় মৌতুপ’ আরাক আহান ‘লইলাট’ পৌরানিক য়ারিহান। ‘রূপায় মৌতুপ’ সামাজিকহান থকয়া ও সময় অমাটিক আদর নাপেইল। আজির দিনে সইনেই আদর পেইতই। লইলাট মহাভারতর বিরাট পৰ্বর য়ারিহানল লেংকরেসেতা থকয়া বৈষ্ণব ভাবাপন্ন বিষ্ণুপ্রিয়া মণিপুরী সমাজে নিয়ামপারা আদর পেইল।

এখুরুম আসরে দেহুরানির নেশাহান হমেইল, গাঙর মানু হাবি খেতি উলা। খেতি ছাড়া উপায় নেই। আকেইগ আকেইগ বিসারেয়া নিয়াম হিনপেয়া মানু জুগার করল।

য়ারিহান— পাশা খেলাই রাজ্য, ধন হাবিতা হারেয়া পঞ্চপাণ্ডব বার বসর বনে থায়া বসর আহান লুকেয়া বিরাট রাজার গরে আসিলা।

যুধিষ্ঠির অসিল - দোৱারিকা সিংহ গিরক, গাঙর পাটাদরগ, নিয়াম চুনা অসিল। বিরাট রাজা-ভিমর পাট মদন এইগাই নিজে করল। কিচক-বরজ সিংহ গিরক, অজা গদইর খুল্লা বেয়ক। সুদেষণ - বিরাট রাজার রাজ রাণী - জয়দেব শৰ্ম্মা গিরক, শিলঙে (পয়লাকার মন্দির পুরহিতগ)। দ্রৌপদী-উত্তরা-হরিমোহন সিংহ গিরক, সাদে বাদে অবিকল নিঙলপির সাদে রূপবতীগ অসিল। অভিমন্যু গাৱরাপুৰা চেঞ্চু সিংহ গিরক, যৌকরে খেতি করে, মঞ্চ মালসিল। এবাকা বুজনৰ মাৰেঙে হবা অয়া আসে। গিরকরাংত মর পাছরেসু য়ারি উতা খমকরলু, গিরকরে হমা কাৎকরুরি। (অৰ্জুন) বিহগলা - বসন্ত সিংহ গিরক হত্তুমেউ বিহগলা মালসিল। নকুল - মণি সিংহ গিরক, সহদেব যে কুন আগই পাঠ করলা। মি গাঙর সৌগ বার ছাত্রগ থকয়া অজা গিরকে মরে লেইসির পারেঙে থসিল। মি হারৌ অয়া দাবদিয়া ফালদিয়া লেইসি করলু। য়ার ফলে মরে নিয়াম বানাপেইলা।

স্কুলে পড়া নারলউ কিত্তা আহান নামাতল। ও দিনেউ হুদা মি বুলিয়া নাগই গাঙহান হাবি ইমা ঠারর প্রতি বার সমাজর প্রতি নুংশিপা মায়া আহান হমেইল। লইলাট পালা এহানল বারমুনি মহাসভাত দেহুরেয়া মদন এইগারে

বার সম্পূর্ণ পালাহানরে পারিল ঔনাপা বাখান করেসি। ত্রিপুরার কইলা শহরে মহাসভাস্ত আরাকউ থাকাত দেসি।

ঔ দিনেস্ত লোবারপুবা গাঙ এহান আমার সমাজে হবা পরিচয়হান অইল। মদন এইগা গিরকর কুড়ি ফুলগ সাদইল। ঔ ফুলর নুংশিপা গৎ উহান চাইরবারাদে সিতারল। গৎহান পেয়া এইগারে বিসারানি অকরলা, এইগা গিরক তার গরর কাদাত বাজারঘাটে হইস্কুল আগ হংকরিয়া থাইলগা। এইগার প্রেরনাই লোবারপুবা গাঙ এহান ইমাঠারর এলা নাসা দিয়া গৈগ অইলা। এইগা মাত্র বসর আহান আসিল। গিরক যানাই গাঙহান হাবি ছদালা অইলা লগউ আসে মাজিগ নেই উহান পারাইল। অর্থ্যাৎ গাঙহান আসে, চালকদারগ নেয়ইল।

ঔ দিনেস্ত যুধিষ্ঠির - দ্বারিকা গিরকে রুপার আরি আগ হংকরিয়া দিগল চুই আগত হজক পিয়া পাসা (দশ পচিশ) খেলানি অকরল। কীচক - ব্রজ গিরকে লপুকে আল দরানি নাকরল। উত্তরা - হরিমোহন গিরক যাত্রাত জেলেইর পাঠ ছাড়া মুনির পাঠ নেনা নাকরল। অভিমন্যু সপ্তরথীয়ে বেয়েয়া মারেসি, ঔ চেনচু গিরক এবাকা মারে নারতরাই বুলিয়া মাতের। বিহমলা - বসন্ত গিরক নাঙ করা রাজধারীগ অয়া নিকুলিল। প্রায় আশির গজে অয়া দৌর খয়া পেইলাগা। এবাকা চেনচু গিরক, জয়দেব শর্মা, হরিমোহন গিরক ভগবানর কৃপায় হবা অয়া আসি।

মদন এইগাই শেষ জীবনে মাতিয়া গেসেগা “লোবারপুবা গাঙ এহান মর তীর্থ ভূমিহান”। পাছরানি নারতৌ এতা-এতা। মদন এইগা গিরকর জীবনি ইকরিয়া লমকরানি সম্ভবহান নাগই। সারা জীবন এহান ইমাঠারর কবিতা, নাটক, ইকরেসে। বিধির বিপাকে তার গরগ জ্বী লাগানিয়ে অনেকতা ব্রহ্মা গিরকে নিয়া গেসেগা উহানউ ব্রহ্মা গিরকর আশীর্বাদ আহান। যেতা যেতা বারাদে বারাদে সিলয়া আসে উতা ইকরিয়া লমকরানি এহান কুন কালে নহিতই।

১৯৫৭ সন এহান লোবারপুবা গাঙর বার এইগা গিরকর ডাঙর স্মরণীয় বসরহান এহান এবাকার সৌসুমারায় হারপানির নিঙে এরে ছরকাং অংশ এহান ইকরলু। বিষ্ণুপ্রিয়া ইমার নুংশিপা সউগ আমারে দুঃখর সাগরে থয়া ২০০৪ সনে পরলোকে গেলগা। গিরক মরিয়াউ অমর অইল।

ঔ দিনে তার লেংকরা কবিতা, এলার সুরে— লইলাটে—
আজি পেয়া আমি কতিউ লইলাটে পরিয়া থাইলাং,
তর ঔ চরণ খয়াত ফুলর ডাল্ল আমি হমা দিয়ার।

ৰূপায় মউতুপ—

মিচাং মান্না অইক,
মিচাং মান্না অইক,

মিচাং মান্নাৰ হুংগত বাহিয়া জিন্মা হাবি।
আহ হাবিয়ে হাবিৰ আগে অইক।
জগত ইমা আসন নাপেয়া
ধূলিত বয়া আসে টুঠেক মুঠেক বাগিয়া।
আমি জিপুত বিষ্ণুপ্ৰিয়া জয় ধ্বনি দিয়া।
ইমাৰ আহিৰ পানি আহ পুজেদিক। ...আৰাকৌ।

রবীন্দ্র কুমার সিংহর স্মৃতি অধ্যায় আহান

১৯৩৯ সন। দ্বিতীয় বিশ্বযুদ্ধর অকরাগ। আকগদে আগ্রাসী বৃটিশ, আমেরিকা যুক্তরাষ্ট্র লগে রাশিয়া। আরাক আগদে জার্মানী, ইটালী, জাপান। দিনে দিনে জ্বি উগ জবর অয়া আহের, কমানির উগদে নেই।

ঔ লাকতি উগৎ রবীন্দ্র কুমার গিরক পাথারকান্দি রাজারগাঁওর সভান্ত পরিবার মনেন্দ্র সিংহ গিরকর বংশে ধনঞ্জয়র ঘরে পুণ্যচেল্লী সূর্যমুখীর ঔরসে জরম অইল।

১৯৪২ সনে যুদ্ধহান চরমে ফরৈলগা। দিশাহারা বৃষ্টিশর হুসবুদ্ধি নেই, পেইককরে হুকুম জারী করল— রাজারগাঁও, নালুগাঁও, উনাম, বুরুঙ্গা উঠিয়া যানা লাকতই। কিতারকা? তানুরতা যুদ্ধর ফয়দুরা গাড়ীর ঘাঠি আগ লাগের। কুরাং যানা? আসামর শেষ সীমা, বার ত্রিপুরার লেজগত পিপালা ছড়াহানর পারে যানা লাকতই। আন্তি, বাঘ, বন ছয়র, ডাঙর ডাঙর হরপ অবাদে রাজত্ব করিয়া আসি।

রবীন্দ্র গিরকর ইমা সূর্যমুখী বার বাবা ধনঞ্জয় কনাক সৌ এতারে খকে, পিঠিত খকরিয়া মুরে বকচা দিয়া সালসি। লোয়ারপুরা পেয়া বাস আসে, আরাক ২০/২৫ কিলোমিটার আটিয়া যানা লাগতই।

লঙ্গাই ছড়ার পারে পারে হুরকাং পথ উগর হাদিত উসব-জঙ্গল, তেরা-উনি নল-খাগরার বিতরে বাঘ লুকেয়া থাইতারা, সুযোগ পেইলেই মানু, গুরু, মইস, মারিয়া খেইতারা ঔ পথ উগর বারাদেউ ঔ সময়ত মানু আজির সাদে গাঙ পাতিয়াই নেই। উগদে গেলেগা দল বাদিয়া যানা লাগের। লোয়ারপুরাত রাতি ফুঁরৈতে-ফুঁরৈতে যাত্রা করলে পিপালাত সেন্দাহান অর। নিয়াম দুঃখর যারিহান— মাত্র দুই আরাইশ বসর আগে মণিপুর বেলেয়া আহানির পরে এখুরুম বৃট্টিশে আরাক খেদা আহান দিলা। ঔ জঙ্গল উগত নিয়াম হিনপেয়া রবীন্দ্র গিরক ডাঙর অনার লগে-লগে লেরিকউ তামকরিয়া ঔ লয়া উগত পইলাকার শিক্ষিতগ অয়া নিকুলিল। চাকরী বিসারেয়া বাহিরে গিয়া বন-বিভাগে হমেইলগা। আন্তি, বাঘর হাদিত ডাঙর অসিলতা থকয়া নুঙেই করে চাকরী করিয়া পদ উন্নতি অইতে অইতে রেঞ্জারগত ফরৈলগা।

গিরকর পূর্বপুরুষ সাহিত্যিক, সামাজিক, আসিলাতা থকয়া গিরকউ ঔ নেশা উহানে পেয়া জনসেবার পথে লামিল।

ধুবরীৰ কাদাত চাপৰে প্ৰতি বসৰ দুৰ্গা পূজা বহেয়া কাদা বাৰাত কাছাড়ী, কোচ-ৰাজবংশীৰ লগে সু-সম্পৰ্ক বজায় থয়া হারৌ পিয়ম কৰিয়া আসি। ঔ দিনৰ নিংশিঙে আজি পেয়া ঔ মানু উতা দুৰ্গা পূজা কৰতারা।

কোকৰাঝাৰ শ্ৰীৰামপুৰ গেইটে মন্দিৰ আগ হংকৰে দিয়া স্থানীয় মানুৰাংত নিয়াম পাৰা আশীৰ্বাদ পেইল।

Sankosh আসাম বেঙ্গলৰ সীমাগত তুষা নদীৰ পাৰে ডাঙৰ শিৱ মন্দিৰ আগ কাংকৰল। উপেইৰ মানুৰে নিয়াম প্ৰশংসা কৰলা।

খামতলে খানাপাৰাত উদয়নগৰ গাঙ এহানাত তাৰ নিজৰ বিটাগত শিৱ মন্দিৰ বাৰ ৰাধা কৃষ্ণ মন্দিৰগ হংকৰিয়া নিয়মিক পূজা কৰানি অকৰল। প্ৰতি বসৰ দুৰ্গা পূজাত মূৰ্তী পালকৰিয়া গাঙ পৰগনা ডাহিয়া অন্নপ্ৰসাদ ভোজনৰ মাধ্যমে জনসেবাত ব্ৰতী অইল। কাদা বাৰাৰ বেইবুনি উতাৰে নামঘৰ মণিকুটগ হংকৰেদিয়া তানুৰ লগে আমাৰ সু-সম্পৰ্ক অয়া থানাৰ পথ সেংকৰে দিল। গিৰক দৌ অইল কিন্তু তাৰ গৃহিনী শ্ৰীমতী ফুলকুমারী গিথানকৰে আদৰ অব্যৰ্থনা কৰতারা। ঔ ভক্তপ্ৰাণ সমাজসেবক গিৰক উগ ১৯৯৭ সনৰ সেপ্টেম্বৰ মাহাত ইহধাম বেলেয়া পৰধামে গেলগা। তাৰ স্মৃতিস্তম্ভ খানাপাৰা শ্বশান-ঘাটে এবাকাউ স্মৃতিহান বহন কৰিয়া আসে। গিৰকৰ আত্মাৰ শান্তি কামনা কৰুৱি।

I got him at Kokrajhar - as P.R. under Gosalgam Division in 1992. He was sent PR w/c Shrirampur Gate. Later in 1994 he joined at Guwahati. PR w/c Harkyam Range. (He died in 1996. Between Jan - June Subject to correction) -

ঐ দিনর নিংশিং

গেলগা দিন পাছরিয়্যার।
আহের দিন নাদেহিয়্যার।।
বিপদে পরলে ভগবান ডাহিয়্যার।
বিপদহান লালইলে বিবুলা অয়্যার।।
এহানেই অসে মনুষ্যর রিতিহান।
এসাদে চলেসে সংসার ধর্মহান।
মনর কথা মনহানাত থার।
অন্তরয়্যামী ভগবানে হারপার।।
হারপেয়া পাপ করলে অর বজ্জহান।
হারনাপেয়া করলে ছতার সমান।।
রত্নাকর দস্যু ডাকাটি করল।
পথিক পেইলে বারেয়া মারল।।
পথিকর ধন-সাম্পাল লুটিয়া।
ইমা-বাবারে থসিল পালিয়া।।
উহানেই তার ধর্মহান বুজেসিল।
মহাপাপে গারিগ জাপদেসিল।।
অন্ধপাপ কর্মহান দেহিয়া।
নারদ ব্রহ্মা আইলা পথিক মালয়া।।
আইতারা ফারা ফুতি পিদিয়া।
হারৌবে চার আহিথম পাকদিয়া।।
কাদাত ফবইলাগাহান দেহিয়া।
গদাগল খেতকরল মারিং বুলিয়া।।
মাতের নারদে ছনহে রত্নাকর।
ইমা বাবারাং গিয়া আংকর।।
পাপ কর্ম খানি নিতাইগাতা?
রত্নাকরে মাতের বেলেয়া জিবাইগাতা?
নারদ ব্রহ্মাই বুজেইতে থাইলা।
তাণ্ডব দস্যুগরে জ্ঞান দিলা।।

লতাল গাছজারে পেচেয়া গেলগা।
হউচুটে গরে গিয়া ফরইলগা।।
ইমা-বাবারে মাতের ডাহিয়া।
পাপিগ অইলু তুমাৰে পালিয়া।।
বাপক চ্যবন মুনিযে মাতের।
পাপ কুনোগউ নেনা নারেৰ।।
পাপৰ ভাগি আকগয়উ নাইতই।
নিজৰ কৰ্মল ফল দরতই।।
ইমা বাবার ঔ কথা ছনিয়া।
রত্নাকৰ আহিল পাগালাগ অয়া।।
হমাদিয়া পৰিল চরণে দরিয়া।
কাঁদেৰ রত্না গরাগরি দিয়া।।
মাতেৰ নারদ হারৌ অয়া।
থাক নিরন্তর রাম রাম বুলিয়া।।
রাম রাম বুলেতে নারেৰ।
মরা শব্দগ মাতে পাৰেৰ।।
রত্নাকৰ থাইল মরা মরা বুলিয়া।
মরাত্ত্ব রাম রাম অলয়া।।
জপিয়া থাইল যুগ যুগ দরিয়া।
রাম নামে মহাপাপ গেলগা ককয়া।।
ক্রেতা যুগে রামৰ ভক্তগ অইল।
মহৰ্ষি বাল্মীকি মুণি পালইল।।
মহাকাব্য রাময়ণ রচনা করিয়া।
জগতে থাইল আদি কবি অয়া।।
জুনাক বেলি যতদিন থাইতাই।
বাল্মীকি মুণিৰ সাক্ষী অইতাই।।
গেলগা দিনৰ হবা পথ চেয়া।
মুঙেদে জিকগা কাকেই কারিয়া।।

পরোপকার

আসিল বৃত্যসুর দুষ্ট দুরাচার।
স্বর্গর দৌরে করের অত্যাচার।।
ব্রহ্মার বরে স্বর্গহান কারলইল।
হিতা হিত জ্ঞান হারেইল।।
ইন্দ্র সরালেল দুঃখ পেয়া।
ব্রহ্মারাং গেলগা যুক্তি করিয়া।।
নির্দুষ দৌর দুঃখ দেহিয়া।
ব্রহ্মা বহিল ধ্যান করিয়া।।
দেহের ধদিচী মুণি আসে বয়া।
ধদিচীর কংকাল ব্রজহান গড়িয়া।।
বৃত্যসুরেরে মারে পারতাই বুলিয়া।
ইন্দ্রেরে যুক্তি দিল প্রমান করিয়া।।
ধদিচী মুনিরে মাতলা বিনয় করিয়া।
স্বর্গর দৌর দুঃখ-দুর্দশা দেহিয়া।।
মহামুণি বহিল ধ্যান করিয়া।
দেহত্যাগ করল খানিঙ্গারা থায়া।।
হংকরলা কংকালর অব্যর্থ বজ্রহান।
বৃত্যসুরেরে মারিয়া পেইলা রাজ্যহান।।
ধদিচীর আত্ম ত্যাগে জিৎতা অইলা।
নিজ রাজ্যে সুখ শান্তিতে থাইলা।।
পরোপকার করিয়া জীবন হারেইল।
অমূল্য জীবন দিয়া পুন্য করল।।


পরমবীর দাতা কর্ণ

মহাবীর কর্ণ আসিল রাজাগ অয়া।
অঙ্গ রাজ্যে আসিল রাজত্ব করিয়া।।
প্রজা বর্গ আসিলা সুখ-শান্তিতে।
পেট বুজিয়া খেইতারা সেলকমে ভাতে।।
চেমপুগ বুজিয়া দের অকাতরে।
লেইরাপা নাথাইলা রাজ্যর বিতরে।।
কর্ণবীর থাইল লেইরাপা চেয়া।
গরে গরে যারগা বিসারেয়া।।
আকদিন শ্রীকৃষ্ণ আহিল অতিথি অলয়া।
জরা জীর্ণ নুরারা চেলপাগ মালয়া।।
মাতের কর্ণরে ঠু-নিংশা বেলেয়া।
নর মাংস খেইলে বালাইতই বুলিয়া।।
কর্ণয় মাতের গারিগ কাপিয়া দিতউ।
অতিথি দেবতারে হারৌ করতৌ।।
অতিথিয়ে মাতের বুড়া মাংস নাইতই।
কঙালা মাংস খানা লাকতই।।
কর্ণয় যাথাং দিল পদ্মাবতীরে।
ডাহিয়া আনগা তর পুতকরে।।
বৃষকেতুরে ডাকল অন্তরে হিনপেয়া।
বৃষকেতু আহিল ভাত খেইং বুলিয়া।।
দুঃখ পেইল ইমার মেইখম দেহিয়া।
মাতের ইমা ভাত দে বুলিয়া।।
পদ্মাবতী কিস্তাউ মাতে নারিরি।
মাতিং বুলতে বানথা অয়া পরিরি।।
কর্ণয় পুতকরে অতিথির যারি দিল।
বৃষকেতু হারপেয়া ইমারে উঠেইল।।
ইমা মর জীবন সার্থক করলু।
কনাক কালে অতিথি সেবা পেইলু।।
এসাদে সেবা কুনগই পেইতই।
সইনেই এগ শ্রীভগবান অইতই।।

মালক পদ্মাবতী রাতল বাদ্য অয়া।
 মুরগ থইল পেলিগল গুরিয়া।।
 অন্তরয়ামী শ্রীকৃষ্ণ হারপেয়া।
 মাতের মুরগ দেই আশ্বল করিয়া।।
 কাদে কাদে আনলগা মুরগ তুলিয়া।
 শ্রীকৃষ্ণ বহিল লেকাটি গারিয়া।।
 হিনে দুঃখে দিল আশ্বল হংকরিয়া।
 বৃষকেতু আসে সৌর লগে খেলেয়া।।
 ডাহিয়া আনগা ভাত খেইক বুলিয়া।
 অতিথির কথা উহান ছনিয়া।।
 খালকরিরি পাগালাগ পাউরি বুলিয়া।
 বৃষকেতুরে ডাহিরি অতিথি কথা লয়া।।
 বৃষকেতু ছমকরের ইমা বুলিয়া।
 মাতের আরাক খানি খেলেইঙ বুলিয়া।।
 পদ্মাবতী দরল পুতকরে পামকরিয়া।
 চুমা দিয়া কাদিরি হক চেলয়া।।
 বৃষকেতু কিন্তাউ হার নাপেইল।
 ইমার আহিরপানি পুসেদিল।।
 বয়া আসে অতিথিগই বাসেয়া।
 খানাত বইলা আকতা অয়া।।
 মাংস-আশ্বল পাতে নাদেকতারা।
 সেলকম ভাত বুজজে দেকতারা।।
 শ্রীকৃষ্ণ নিজর রূপহান দরল।
 মহাবীর কণই ভক্তি কাতকরল।।
 মাতের কৃষ্ণই অভাব নেয়ইতই।
 দাতা কণ বুলিয়া খ্যাতি অইতই।।
 প্রবল প্রতাপশালী কণরে ডরপাসি।
 প্রজায় আকাল-দুর্ভিক্ষ নাদেহেসি।।
 হবা রাজার প্রজা নুঙেই অইতারা।
 দুষ্ট রাজার প্রজা হিনপেইতারা।।
 মহাকালর মহা প্রলয় কাদাত আহিল।
 কুরুক্ষেত্রে মহাযুদ্ধর মইপং রহিল।।
 দ্বাপর যুগহান লময়া আহের।
 কলি যুগহান হমেইঙ বুলের।।

প্রলয়ঙ্কর জিগ লাগতই দেহিয়া।
 শ্রীকৃষ্ণ গেলগা শান্তি দুংগ অলয়া।।
 মাতলগা পাচহান গাঙ দেই বুলিয়া।
 মানী দূর্যধনে মাতল অপমান করিয়া।।
 ছচিগর আগাগর মাটিউ নান্তউ।
 গোবালার পুতকরে বাদিয়া থইতউ।।
 শ্রীকৃষ্ণ ভিষাম্বর মূর্তী ধারণ করল।
 অহংকারী দূর্যধনে স্বীকার নাকরল।।
 পঞ্চপাণ্ডব ইমা-মাটি না এরাদিল।
 ধর্মর পথগল যুদ্ধত লামলা।।
 অন্ধ ধৃতরাষ্ট্র ধর্মহান নাদেকল।
 রাজ্য লোভে পাপর পথগ দরল।।
 কৌরব পাণ্ডব যুদ্ধর সিঁজিল করলা।।
 ভারত যুদ্ধে রাজা মহারাজা আইলা।।
 মহাবীর কর্ণ কৌরব পক্ষ অয়া আসে।
 অবধ্য-অপরাজয় কবচ কুণ্ডল পিদেশে।।
 অর্জুন ইন্দ্রর বর পুতক থকয়া।
 খালকরের কিহান করতউ বুলিয়া।।
 আকদিন আহিল ইন্দ্র বামুণগ অলয়া।
 প্রার্থনা করের কবচ-কুণ্ডল দে বুলিয়া।।
 কর্ণয় হারপেইল ইন্দ্রই ছলনা করেসে।
 অর্জুনর হিতার্থে বামুনগ মালসে।।
 দানবীর কর্ণই মহা সংকল্প করেসে।
 কুনোদিন প্রার্থীরে আলথক নাকরেসে।।
 ভারত যুদ্ধে সইনেই মরতই হারপেইল।
 গারিগ কাপিয়া কবচ-কুণ্ডল দান করল।।
 ১৮ দিন দরিয়া মহাযুদ্ধ করলা।
 রথী মহারথী প্রাণ আশ্রতি দিলা।।
 মহাবীর কর্ণ মরিল অর্জুনর আতে।
 দাতাকর্ণ বুলিয়া থাইল মহাভারতে।।
 দানর মহাপুণ্য হাবিয়ে হারনাপাসি।
 দান করতারা ভক্ত উতাই হারনাপাসি।।

গুরাহাটীৰ বিষুপ্ৰিয়া মণিপুৰী পৱেসি
লয়াৰ লেখা চিত্ৰগ





সঞ্জয় সিংহ
উদয় নগর, খানাপারা



রাজেন্দ্র সিংহ (রাজু)
উদয় নগর, খানাপারা